

李文恭公遺集

李文恭公奏議卷二十一目錄

湘陰李星沅石梧著

男

概榛

編次

使粵

遵

旨馳往粵西會勦叩謝

天恩摺子

恭報馳抵粵西卽赴柳州暫駐籌勦摺子

並條陳

附奏懇

恩暫令已革廣西巡撫鄭祖琛隨營効力片子

附奏請調雲貴將官片子

會奏懇撥軍餉三十萬兩摺子

會奏籌勦金田逆匪懇調提鎮大員協勦摺子

會奏參革副將李殿元都司宋煜守備陶玉德等

問片子

會奏查參都司譚承德革職等問摺子

會奏懇

恩分局收捐摺子

會奏請調楚省將官來粵分帶楚兵摺子

會奏參革參將李英仍行枷號片子

會奏開復千總甘裕明片子

附奏查明滇兵接仗情形片子

附奏拏獲慶遠賊首張晚片子

附奏丁憂知縣豐安畱營差遣片子

二
縷陳領密籌勦金田逆匪事宜並奉到

欽差大臣關防日期片子

會奏官兵進勦金田逆匪追賊遇伏請將傷亡弁
兵議卹摺子

會奏右江官兵勦捕上龍土司賊匪獲勝並派員
勦辦都結等土州股匪摺子

會奏南甯太平梧州修仁貴縣柳城來賓武宣等
處拏獲匪犯片子

會奏遵

旨保舉湖南隨勦將備弁兵及糧局文員摺子

并清單

附奏保舉桂平縣知縣李孟羣團長黎建勲黎緝

熙拏獲陳亞潰出力片子

附奏請獎廕生向繼雄隨營出力片子

附奏藩司勞崇光仍駐梧州片子

懇撥軍餉八十萬兩摺子

遵

旨查復已革提督閔正鳳總兵盛筠在任情形摺子

附奏病痊知府朱德璣丁憂通判熊光緒均畱營

効力片子

附奏知照兩粵交界地方文武防勦賊匪片子

會奏官兵進勦金田逆匪兩次大勝摺子

會奏查覆現在賊首股數並請調雲貴官兵摺子

附清單

會奏永安蒼梧遷江象州平南宣化來賓東蘭河

池博白等處拏獲匪犯片子

會奏粵西蠲緩毋庸查辦請將本年新賦緩俟軍務告戢後啟征摺子

會奏查參上年失事廳州營員一併革職摺子

附奏密覆

寄諭並遵

旨飭令鄭祖琛回籍片子

會奏官兵焚攻金田逆匪巢穴賊黨敗竄摺子

附奏查參游擊馬芳春都司麻長慶摘頂仍革留

片子

恭謝

頒賞

宣宗成皇帝詩文餘集摺子

會奏請

簡將軍督勦並添調皖豫官兵摺子

遵

旨馳往粵西會勦叩謝

天恩摺子

奏爲欽遵

諭旨卽日馳往粵西會剿恭摺奏

聞叩謝

天恩事竊臣於道光三十年十一月二十日子時承准

軍機大臣字寄十一月十二日奉

上諭據徐繼畬馳奏林則徐遵旨赴粵行至潮州途次
病逝已有旨命李星沅爲欽差大臣頒給關防馳驛
前往廣西剿辦逆匪並令周天爵署理廣西巡撫一
併馳驛前往矣李星沅周天爵接奉此旨諒卽兼程
赴粵惟粵西賊勢披猖疊竄城邑戕害官弁蹂躪地
方雖經鄭祖琛等督兵追捕於平樂一帶屢獲勝仗
竝擒首要各匪而左右江各屬股數衆多四處搶掠
勢甚蔓延李星沅自楚抵粵程途較近周天爵未到

任以前已命勞崇光署理撫篆現計湖南貴州雲南等省所調官兵已有六千名次第可到該大臣卽會同該署撫及向榮張必祿等悉心籌商督飭文武相機兜剿務期擒渠殲醜淨絕根株勿致竄逸勾結方爲不負委任其鄭祖琛前在巡撫任內周旋粉飾各情已革提督閔正鳳畏葸無能及該省地方失事官弁率多逃避捏飾之處疊經寄諭林則徐認真訪查現已諭令徐廣縉將林則徐所奉諭旨各件檢齊封

固派員實至粵西李星沅接收後卽當逐加訪查務令水落石出據實覆奏斷不可稍有不實不盡將此由五百里諭令知之欽此聞

命自

天感悚無地臣查粵西賊匪猖獗經年剽掠城池荼毒百姓風聞狼奔豕突已及三十餘州縣之多全省幾無安土實屬罪大惡極屢經前撫臣鄭祖琛會兵勦捕時有斬獲而賊踪出沒無定賊夥聚散無

定且與廣東賊勢聲息相通互爲消長竄逸勾結
早在

聖鑒之中臣軍旅未嫻敢不臨事而懼伏念

兩朝恩遇

重寄特膺分應勉策驚駘及時報効宿疾固所弗計將
母亦所不遑臣卽於二十一日由長沙兼程遄發
旬日可抵桂林現在各路官兵已到若干未到若
干賊氛或遠或近股匪孰少孰多應如何偵探掩

捕決策制勝臣身任督師應否駐劄梧州先扼粵
西門戶以防賊之出入署撫臣及兩提臣應否分
布犄角擇隘堵剿以防賊之紛歧統俟馳抵該省
會商熟計相機調遣隨時籲請

訓示總期激厲將士實力同心仰仗

天威廓清邊圉勉副

聖主委任至前撫臣

鄭祖琛已革提督閔正鳳及地方

失事各官有無周旋畏葸等弊一俟兩廣督臣徐

廣緒交到節奉

諭旨臣當認真訪查據實覆

奏斷不敢稍有不實不盡謹繕摺由驛叩謝

天恩伏乞

皇上聖鑒謹

奏 道光三十年十一月二十日具

奏奉

硃批知道了欽此

恭報馳抵粵西卽赴柳州暫駐籌剿摺子

附條陳

奏爲恭報

微臣

馳抵粵西日期卽赴柳州府暫駐會

籌剿賊恭摺由驛奏祈

聖鑒事竊臣於道光三十年十一月二十日奉

諭作爲欽差大臣迅赴粵西剿辦賊匪卽於二十一日

由長沙兼程遄發恭摺馳

奏在案二十八日行入粵境沿途悉心探訪十二月

初二日馳抵省城接見文武各員並本地紳士詳

加考究僉云賊匪之害蘊蓄多年近乃決裂不可
制同一匪而有內匪外匪同一內匪而又有土匪
會匪其股數之糾紛窺擾之遠近適與本省山重
水複鄰省四通八達相倚爲奸迥異尋常賊勢前
撫臣鄭祖琛帶兵出省督辦四月有餘疊次擒獲
首要各犯竝殲斃股匪次第

奏報嗣蒙

簡調提臣向榮竝調雲南貴州湖南三省官兵會同進

剿提臣自抵粵西連獲勝仗柳州慶遠諸賊甫經
奮勇追剿而左右江數屬勢尙蔓延卽如潯州府
之大黃江現有賊匪結夥排船伺劫桂平之金田
村另有會匪聚集號稱萬餘竝帖僞示誘脅附近
平南鬱林等處賊踪出沒詭秘人數恐尙不少業
經前撫臣函商提臣親帶湖南官兵二千名由貴
縣馳往潯州會合貴州官兵二千名分別先後相
機攻剿日內曾否開仗尙未據報臣卽飛速行催

務令擇要截擊一面酌帶員弁馳赴柳州府城暫
駐策應分途飭防提臣向榮現駐潯州署撫臣勞
崇光現駐梧州相距均不甚遠彼此互爲聲援仍
將各路軍情酌量遠近駐劄或分或合隨時移營
調遣查奉調官兵現止雲南二千名未報入境風
聞賊擾隆安復經飛札迎提令由思恩百色行經
南甯一帶探明何處有賊立即向前轟擊無稍逗
畱統計籌剿大畧要在振士氣而寒賊膽合羣力

以固民心誠如

聖諭解散脅從之黨堵截分竄之路謹就現在情形約
舉六條另片繕呈

御覽祇候

訓示遵行至軍務應變神明存乎其人臣惟有信賞必
罰殫竭血誠和衷商榷迅圖攻剿以期上紓

宸念再

欽差大臣關防現在尙未奉到所有行營文札臣仍沿

途借印合併陳明伏乞

皇上聖鑒謹

奏 道光三十年十二月初五日具

奏奉

硃批另有旨欽此

一整軍伍客兵人衆氣囂易形龐雜必先申明紀律
靜密無譁俾將有謀而兵聽之兵有勇而將察之
寇至不驚寇去不忽小挫無怯小勝無驕總以扼
要分捕爲目前要著又兵器利則膽壯如應添槍
礮火藥等件已飭省局趕辦又地雷火箭湖南製
造較精現擬咨明撫臣委員上緊監造陸續押運
前來以濟緩急

一聯兵勢賊匪無定數官兵有定數衆寡頗不相敵

亟須相度地形彼此列爲犄角水陸互爲聲援無
令囿於一處卽_臣等駐劄處所惟視賊氛所向何
處切近何處喫緊隨時酌定行營三路居中調遣
賊夥小則分擊大則合圍前則迎截後則追剿漸
偪漸近漸近漸少庶不終於散漫

一偵賊情地方被賊擾害已及兩年其孰長孰短當
令官兵共悉連日密切探訪如賊恃火罐必用籐
牌遮攔利刃直接賊熟水路必於過渡轟殺兩岸

伏兵賊利在飽颺必從間道襲之而以疑兵迷其
往賊利在驟戰必遣游鋒擾之而以勁卒擊其衰
臣卽密商署撫臣及提臣遴選驍健將備親爲指
授無許漏洩

一散賊黨股匪裹脅日衆其中豈無良懦強爲附和
卽偶知自悔亦恐官繩以法臣卽剴切出示曉以
利害懾以聲威令其速自解散各營生計以冀化
莠爲良地方多一良民卽少一賊匪其有殺賊自

贖臣卽酌賞示勸果能擒渠獻馘量爲破格邀
恩似亦釜底抽薪之法

一嚴守望粵西山水交錯地方窩遠賊已到處蔓延
勢不能全資兵力故以兵衛民尤宜使民自衛有
賊處利用剿無賊處利用守其法以保甲團練相
輔而行小村併入大村平處移向險處掘溝築堡
人糧聚集失業者得以備趁可免從匪誠能堅壁
清野賊至無所得食且進退牽綴不敢縱其所之

將不戰而亦困

一廣投効粵西地瘠民貧連年倍形困苦地方官疲
於奔命亦幾智盡能索實皆勉力支持故欲壁壘
一新惟在得人而理如有文武官紳情願投營効
用無論本省他省均擬量材收錄藉資羣策羣力
或能捐資助餉及捐辦軍火器械亦卽由糧臺分
別驗收冊報事竣核實

奏獎以期事半功倍

留軍機處備查

附奏懇

恩暫令已革廣西巡撫鄧祖琛隨營効力片子

再前撫臣鄧祖琛奉

旨革職甫由梧州回省臣與之晤談察其年老多病而

心思尙密愧奮激昂於通省地形及各路兵力賊
勢均能言之了了當軍務需人之際不揣冒昧可
否籲懇

天恩暫令鄧祖琛隨營自効俾資熟手其應行查辦之

處臣仍嚴密確訪據實上

聞斷不敢稍涉徇隱自干咎戾謹附片密陳伏乞

聖鑒訓示謹

奏

硃批另有旨欽此

附奏請調雲貴將官片子

再臣伏思行兵之要莫如選將籌餉廣西此次軍興仰蒙

皇上飭部撥銀五十萬兩以濟支用臣甫抵省城面詢署藩司吳鼎昌據稱自本年七月至十一月底已由司庫解運銀四十餘萬兩撥款現存無多聞之實深焦慮至領兵接仗專恃將才署撫臣周天爵長於武備到粵需時現惟提臣向榮身先士卒奮

勇轉戰臣愛之重之恨不能披堅執銳與之左右
亟願多得裨將藉供臂指查雲南游擊呂飛鵬都
司李廷楷施嘉祥貴州游擊任大貴何澤都司彭
長春臣夙知其勇幹應請

敕下雲貴督撫臣分別檄令兼程來粵協剿以期迅速
藏事又聞林則徐前次道經粵東曾經會商兩廣
督臣選定潮州鎮標官兵一千名隨剿粵西需兵
孔急臣仍備文咨調伏乞

命下遵行謹

奏奉

硃批另有旨欽此內閣奉

上諭李星沅奏請調武弁等語雲南游擊呂飛鵬都司
李廷楷施嘉祥貴州游擊任大貴何澤都司彭長春
著雲貴總督飭令兼程赴粵以備調遣欽此

會奏懇撥軍餉三十萬兩摺子

奏爲軍餉急需懇

恩飭部續撥以資轉運恭摺仰祈

聖鑒事竊臣李星沅欽奉

諭旨會剿粵西盜匪前於行次桂林卽將軍需撥款所
存無多附片陳

奏在案茲據署布政使吳鼎昌詳稱粵西剿捕各處
匪徒先於省城設立糧臺軍需總局竝於南甯賓

州平樂潯州梧州太平柳州慶遠思恩鬱林等府
州分設糧臺支應局派員管理轉運糧餉軍火等
件所有支用文武官員薪水鹽菜口糧添製軍械
礮火採買米石雇募壯勇及隨營長夫臺站馬站
里夫各項安家工食夫船腳價駝馬折夫一切應
用經費均由司庫陸續轉運隨時接濟竝以此次
軍需先經督撫臣會核具

奏飭司籌動梧潯兩廠一百二十五六兩次及額外

盈餘共銀六萬七千兩又道庫土司鹽羨銀三萬兩隨奉部撥湖南兵餉等銀十萬兩又廣東關稅地丁等銀三十萬兩通共銀四十九萬七千兩自修荔匪徒滋事以來計由司庫解運及截留廣東餉銀撥解各糧臺及各局支用共銀四十九萬六千餘兩內除湖南解到銀五萬兩廣東解到銀三十萬兩動支撥解外餘於司庫地丁正項及解部減平各款內籌墊借支現在修仁荔浦柳州慶遠

思恩一帶尙有畱防兵勇而潯州南甯太平等處
正當剿捕吃緊之時兵勇雲集經費倍增且由各
府州縣墊用各款多半尙未給領應請

奏明續撥軍餉三十萬兩等情臣等查廣西此次軍
興本省外省官兵壯勇人數衆多調遣往來需費
甚鉅旣據該署司詳稱前撥銀兩支用已罄自當
續籌接濟俾免臨時周章合無仰懇

聖恩勅部於附近省分酌撥軍餉銀三十萬兩迅速解

運來西以備緩急如獲及早藏事支用有餘仍卽
咨明截留或分別報撥斷不敢稍任糜費謹會同
兩廣總督臣徐廣縉恭摺由驛具
奏伏乞

皇上聖鑒訓示謹

奏
道光三十年十二月二十日具
奏奉

硃批戶部速議具奏欽此

會奏籌剿金田逆匪懇調提鎮大員協剿摺子

奏爲桂平金田村大股會匪抗拒官兵亟籌全力攻剿迅就撲滅竝請

簡調提鎮大員分任領兵追捕恭摺由驛奏祈

聖鑒事廣西賊勢披猖各自爲黨如潯州府桂平縣之金田村賊首韋正洪秀全等私結尙弟會擅帖僞號僞示招集游匪萬餘肆行不法十一月二十九

日經貴州鎮將督帶該省官兵會同本省文委各

員及兵勇團練三路進攻奮勇衝擊該匪復敢恃
衆圍裹致傷副將一員竝官弁兵勇多名當經臣
勞崇光臣向榮會摺具

奏在案臣李星沅兼程入粵省外各營均未及知途
次聞信憤深髮指卽於十二月十五日馳抵柳州
府城柳州本適中之地現值南甯太平慶遠思恩
一帶賊氛未靖左右均可兼顧至潯州水路尤爲
切近連日往復密商查得金田賊巢前瀕府江支

河後倚紫荆朋隘諸山中環村落距城四十餘里
界連平南象州永安武宣修仁等處時有賊匪出
沒近日恃衆抗拒水陸鴟張實爲羣盜之尤必先
厚集兵力乃克一鼓作氣聚而殲之臣向榮親帶
楚兵二千名正在橫州剿賊接據文報及臣勞崇
光函商卽由橫州貴縣馳赴潯州計合黔兵二千
名猶爲彼衆我寡適據署南甯府知府稟稱雲南
臨元鎮總兵李能臣管帶滇兵二千名於十一月

二十四日行至果化土地塘遇賊接仗殺賊數百
名割獲首級耳記八十餘件並奪獲義勝堂大旗
及鎗礮火藥器械甚多二十五日入山追剿復殺
賊匪多名兼獲鎗礮等件該匪潛伏轟打弁兵亦
致傷亡已飭據實冊報賊匪旋竄都結土屬逃散
該總兵行抵南甯正擬會合鎮道併太平一路搜
剿而以金田村大股會匪相提並較自應先其所
急卽經飛調滇兵二千名迅由鎮將管帶從南甯

水路赴潯合黔楚官兵四千名均由臣向榮布置
策遣相機進攻總期分應合圍設伏設備擒渠埽
穴在此一舉其南甯太平等處諄飭左右江兩鎮
及該道府等會督官兵壯勇或堵或剿節節嚴防
一俟金田辦竣迅卽移兵分捕輕重緩急之間臣
等再三籌計至金田賊匪人眾需糧勢必四出劫
掠疊經密飭附近州縣會營多帶兵練擇隘堵截
使之坐困乏食其後路逼近山獠亦飭潯州府縣

預先設法開導毋爲賊誘竝擬酌雇獠練使之從
後來攻辦理皆刻不容緩惟廣西幅員延袤股匪
縱橫官兵各路追捕必須勇幹大員統帶接戰前
蒙

飭諭候補提督張必祿前來業已至潯病故現在分任
乏人臣等會查貴州提臣秦鍾英久居邊要曉暢
機宜貴州鎮遠鎮總兵秦定三曾任廣西將官情
形熟練皆可望其得力懇

恩准於兩員中揀調一員就近迅赴軍營卽令統帶黔
兵分途搜捕以冀尅期蕝事所有臣等會籌進攻
金田賊匪竝請

簡調提鎮大員領兵分剿各緣由謹會同兩廣總督臣
徐廣縉恭摺由驛具

奏伏乞

皇上聖鑒訓示謹

奏 道光三十年十二月二十日具

奏奉

硃批另有旨欽此

會奏參革副將李殿元都司宋煜守備陶玉德等

問片

再平南縣屬之思旺墟前因賊匪竄踞潯州協副將李殿元署提標游擊事都司宋煜署柳州城守營都司事守備陶玉德帶兵會縣堵禦不力經臣勞崇光臣向榮具摺

奏參摘去頂帶責令戴罪立功一面批司確查究辦日內尚未查覆臣李星沅復經會商該副將李殿

元等均甫經蒙

恩開復之員奉委防堵要隘兵練竝不爲少乃任賊匪
衝突且致署秦川司巡檢張鏞禦賊被戕膽玩已
極廣西營務廢弛動以賊衆爲詞幾成故套亟須
嚴切究懲相應請

旨將副將李殿元都司宋煜守備陶玉德先行革職拏
問仍確查是日遇賊如果李殿元等逃避不前卽
行審擬

奏明按照軍律治罪以昭儆戒謹會同兩廣督臣徐

廣縉附片

奏參伏乞

聖鑒訓示謹

奏

硃批另有旨欽此內閣奉

上諭李星沅等奏請將堵禦不力之副將等革職拏問
等語廣西潯州協副將李殿元署提標游擊事都司

宋煜署柳州城守營都司事守備陶玉德前因賊匪
竄踞思旺墟堵禦不力經勞崇光向榮奏參降旨摘
去頂帶責令戴罪自効茲據該大臣奏稱該員等防
堵要隘所帶兵練不少乃任賊匪衝突致巡檢張鏞
遇賊被戕實屬膽玩李殿元宋煜陶玉德均著先行
革職拏問仍確查如有遇賊逃避等情卽行按律嚴
辦以昭儆戒該部知道欽此

會奏查參都司譚承德革職拏問摺子

奏爲遵

旨確查臨事逃避之都司請

旨革職拏問以憑嚴訊究辦恭摺仰祈

聖鑒事竊臣等於道光三十年十二月十六日承准軍

機大臣字寄道光三十年十二月初一日奉

上諭據徐廣縉奏署龍憑營都司譚承德於匪徒逼近

州境時將關防軍裝等件交該營把總看管先自逃

避等語似此喪心無恥深堪痛恨著一併確查實情
從嚴治罪等因欽此臣等查此案前據龍州廳照磨
朱濂具稟賊匪竄擾州城前龍州同知王淑元不
知下落竝聞該都司譚承德將關防軍裝等項札
交把總看管先自出營及事後稟稱與賊打仗是
否捏詞飾稟卽經督撫臣嚴飭確查在案臣等此
次接奉

諭旨復經飛飭該管道府確查詳辦茲據署左江道彭

煥轉據署太平府知府吳德徵護新太協副將謝
陞恩稟據代理龍州同知李懋莘稟稱該署都司
譚永德供稱賊匪未到之先奉本協札飭防堵倉
卒之間當將關防並留存軍裝等件交與把總袁
國璘等收管卽帶領弁兵前赴苛村要口堵禦未
及向文員商議亦未通知詎該匪卽由水路竄入
龍州盤踞至八月初七日團練與賊匪打仗同知
王淑元被賊拒傷掠去伊先已帶兵轉回賊衆兵

單未能救護詰以所稟與賊打仗受傷情事語涉含糊竝傳該把總袁國璘等詳細查詢據供大畧相同各等情前來臣等查該署都司譚永德於賊匪尙未入境之先卽將關防軍裝等件交與把總袁國璘等收管情形已徵恇怯如果亟思防堵自應查明賊匪來路或水或陸何處扼要與該同知王淑元面商妥辦豈有竝不會商亦不向人告知卽行他出同城文武皆不知其所往之理至所稱

趕回與賊打仗受傷則更毫無所據其爲事先聞風逃避事後捏詞粉飾均可概見若不嚴行究辦何以整肅戎行相應請

旨將該署都司譚承德革職拏問以憑嚴審確情照律治罪除先行摘印另委接署並札飭該道府將譚承德立即拏解及應質兵練人等一併解齊訊辦外謹會同兩廣總督臣徐廣縉合詞恭摺由驛具奏伏乞

皇上聖鑒訓示謹

奏 咸豐元年正月初四日具

奏奉

硃批另有旨欽此內閣奉

上諭李星沅等奏查明臨事逃避之都司請旨革職拏
問一摺廣西署龍憑營都司譚承德於賊匪尙未入
境之先卽將關防等件交該營把總看管先自逃避
迨賊匪竄入龍州該州知州被賊掠去又未能卽時

救護所稱打仗受傷之處毫無憑據顯係捏飾似此
喪心無恥實堪痛恨譚永德著革職拏問交該大臣
嚴審確情按律治罪該部知道欽此

會奏懇

恩分局收捐摺子

奏爲查照東省奏案懇

恩分局收捐以示體恤恭摺仰祈

聖鑒事竊准兩廣督臣廣東撫臣咨開准吏部咨本部

會議粵東粵西剿捕土匪所需糧餉請准在粵東

暫開捐輸並聲明援照道光二十八年順天捐輸

章程給予議叙一摺道光三十年十一月十一日

奉

旨依議欽此當經一體札行藩司出示曉諭並順天捐
輸章程檄發刊刻遵照辦理臣等復查廣西各屬
賊勢蔓延疊經前撫臣等派撥本省各標鎮協營
官兵分途剿辦嗣奉

奏調湖南雲南貴州各路官兵來西會剿各府州分
設糧臺委員按日支應所需經費甚繁前蒙

飭撥餉銀五十萬兩漸次用罄復經

奏請續撥銀三十萬兩尙未奉到

諭旨仰懇

飭部迅卽撥解以應急需至廣東奏定捐輸原爲兩省
剿捕之用惟自道光三十年九月二十七日欽奉

上諭廣西逆匪滋擾如紳士商民有能自爲團練竝出
資協助軍需者事竣查明奏請優加獎勵以爲好義
急公者勸等因欽此當經前撫臣劉切示諭團練實
力舉行本省紳民及外省士商等均知感激奮興

自願出資助餉情形尙爲踴躍第至廣東省城水陸皆千數百里必令捐生前往遞呈上兌未免多費行資且湖南地界毗連江西貴州亦多接壤若由粵西而東舍近求遠勢將聞風裹足卽粵東收有成數陸續撥用亦增長途解運之煩相應籲懇天恩俯准於廣西省城設立分局就近收捐一切查照部行竝遴委公正明幹之員認真經理其收支確數隨時密切訪查一有虛冒情弊據實嚴參懲處

仍核記所收銀數每屆三月彙

奏一次以歸畫一所有臣等籌議分局收捐緣由謹
合詞恭摺由驛具

奏伏乞

皇上聖鑒訓示謹

奏 咸豐元年正月初四日具

奏奉

硃批另有旨欽此內閣奉

上諭李星沅等奏請分局收捐一摺廣東暫開捐輸原
爲兩省剿捕之用現在廣西需費較繁旣據奏稱該
省紳民及外省士商捐資助餉情形踴躍若必令赴
廣東報捐未免轉增周折著准其於廣西省城設立
分局就近收捐查照部行章程妥辦餘著照所擬辦
理該部知道欽此

會奏請調楚省將官來粵分帶楚兵摺子

奏爲分帶楚兵需用楚省將官請

旨飭調來粵以資策遣恭摺仰祈

聖鑒事竊臣向榮前在湖南蒙

恩調任粵西並派楚兵二千名隨同剿賊當經酌擬副
將博春和春參將李英游擊瞿騰龍四員分起管
帶恭摺

奏明在案嗣准湖廣督臣裕泰咨會博春委署鎮寧

鎮總兵瞿騰龍應留本營經理是以未卽偕行現在參將李英追捕不力業經

奏參革職所帶楚省官兵暫令和春兼管實屬權宜辦法粵西股匪歧出官兵各路追捕必須董率有人且非楚省將官於楚兵性情技藝一時未能周知斷難望其適用臣等再三籌度查博春近已交卸署篆瞿騰龍本營事簡較此間分攻合剿時勢迥不相同當需材孔亟之餘未敢稍存遷就相應

籲懇

天恩俯如臣向榮前奏

諭飭湖南靖州協副將博春准升鎮筸右營遊擊瞿騰
龍迅卽兼程來粵分帶楚省官兵以期同心協力
早收成效感荷

鴻慈實無旣極謹會同兩廣督臣徐廣縉合詞恭摺由
驛具

奏伏乞

皇上聖鑒訓示謹

奏 咸豐元年正月初四日具

奏奉

硃批另有旨欽此內閣奉

上諭李星沅等奏請調營員分帶楚兵一摺湖南靖州
協副將博春准升鎮守右營遊擊瞿騰龍著署湖廣
總督龔裕迅飭該二員兼程赴粵交李星沅等酌飭
分帶楚省官兵以資策遣欽此

會奏參革參將李英仍行枷號片子

再臣向榮前督楚兵於道光三十年十一月二十七日在橫州陶墟剿捕謝長腰四股匪大獲勝仗旋據探明該匪帶同夥黨由鎮龍山折回嶺背地方當經派令桂陽營參將李英管帶官兵五百名馳赴陸路墟攔頭堵剿據該參將回營稟稱賊匪聞已竄至嶺背恐兵單未敢往剿等語當經嚴加申飭並添派官兵五百名飭卽跟踪追拏復於

十二月初七日起至石陵與賊接仗失利傷斃兵丁四十餘名實屬剿捕不力應卽

奏參治罪_臣等覆查該參將自隨入粵西連次剿賊頗有微勞乃不一力奮勉致有此失咎無可諉相應請

旨將湖南桂陽營參將李英卽行革職仍枷號營門兩箇月示衆以昭儆戒謹會同兩廣督_臣徐廣縉合詞附片具

奏伏乞

聖鑒訓示謹

奏

硃批另有旨欽此內閣奉

上諭李星沅等奏參剿捕不力之參將等語上年提督
向榮在橫州陶墟剿捕賊匪大獲勝仗派令湖南桂
陽營參將李英帶兵馳赴陸路圩堵剿該參將以兵
單爲詞迨添兵飭剿又復失利不能因其前次剿賊

著有微勞稍爲寬貸李英著卽革職仍枷號營門兩箇月以示儆戒該部知道欽此

會奏開復千總甘裕明片子

再查粵西盜匪多由外匪勾串節經臣等飭行連界各州縣嚴密堵捕在案茲據宣化縣知縣李天鈺稟稱道光三十年十二月初十日廣東欽州靈山地方賊匪二千餘人竄至本縣塘豹墟板寨等村擄掠當經稟商該管道府添派三官巡檢龍永升隨同該縣會督團練雷志勇等分兵防剿復經該鎮派委把總陳振威已革千總甘裕明擇隘設

伏兇拏旋將該匪誘至良利地方四面突起圍剿
殺斃賊匪數百名落河淹斃無數奪獲大礮火藥
籐牌長針等件甘裕明殺賊三人兵丁生擒五人
團練壯丁生擒九人竝呈送首級二十七顆查點
團練傷斃三人壯丁七人兵丁間有受傷各匪四
散遁匿訊據生擒賊犯趙亞全等供係廣東欽州
人均各聽從首犯鄭晚李志業糾邀入境焚搶驟
遇兵練圍拏致斃數百人鄭晚已被壯丁殺死李

志業受傷奔逃等語除飭該鎮道審明就地正法
並團練壯勇由縣分別給賞仍追剿竄匿餘匪外
已革千總甘裕明把總陳振威巡檢龍允升等堵
剿出力相應懇

恩准予甘裕明開復千總原官餘容臣等存記獎拔以
示鼓勵謹合詞附片具

奏伏乞

聖鑒訓示謹

奏

硃批另有旨欽此內閣奉

上諭李星沅等奏請開復革弁等語廣西已革千總甘裕明於廣東欽州靈山賊匪竄入宣化縣境內把總陳振威巡檢龍允升等督率兵練設伏兜剿殲擒賊匪多名並將首匪鄭晚擊斃尙屬奮勉出力甘裕明著准其開復千總原官以示鼓勵餘著照所擬辦理該部知道欽此

附奏查明滇兵接仗情形片子

再查雲南臨元鎮總兵李能臣管帶該省官兵二千名上年十一月二十四五等日在果化土地塘遇賊接仗先獲全勝旋因入山追剿弁兵亦有傷亡當飭據實冊報竝於臣等十二月二十日會摺奏明在案茲據該總兵造冊具報前來臣等復查上年十一月二十四日雲南官兵行至果化土地塘遇賊數千人竄擾經該總兵李能臣親督都司李

登魁守備申有謀等直前攻擊及百色廳同知孫
蒙代理奉議州州判易見心竝田州果化兩土司
暨各紳壯練勇合力剿捕轟斃賊匪數百名奪獲
義勝堂大旗一桿大銅鐵礮八件刀矛器械火藥
鉛子無算賊匪敗竄入山二十五日該總兵復經
督飭追剿殲斃賊匪多名竝獲刀矛礮械等件因
該匪潛伏要口連用檣礮轟打我兵鼓勇力戰致
有傷斃賊卽連夜分竄都結佶倫各土屬逃匿是

雲南官兵兩日攻剿均經殺賊奪械惟查臨元鎮
標中營把總張彩雲候補把總武舉王恩詔左營
千總張世成署千總事右營把總石貴右營額外
常顯仁世襲雲騎尉薛大經開化鎮標署千總合
永平把總李逢春候補把總馬良春外委張應星
額外易閩昌奮不顧身衝擊遇害均堪憫惜仰懇
聖恩敕部分別賜卹以慰忠魂其陣亡兵勇士練照例
咨部辦理又護上思營都司千總雷振坤上年十

一月初二日由南甯府請領礮械回營初三日行至那鄉五塘之那隆剝江村適遇股匪被團練堵捕雷振坤上前協拏殲斃賊匪數名餘匪逃散雷振坤受傷殞命當經隨丁興歸未據呈報旋由該府縣查明驗報前來臣等飭查屬實所有護上思營都司千總雷振坤相應懇

恩循例賜卹合併附陳伏乞

聖鑒訓示謹

奏

硃批另有旨欽此內閣奉

上諭李星沅等奏查明雲南官兵接仗情形等語據奏
上年雲南臨元鎮總兵李能臣管帶該省官兵二千
名行至果化土地塘遇賊數千人竄擾經該總兵等
親督員弁並各紳壯練勇奮力剿擊均經殺賊奪械
因該匪潛伏要口連用槍礮轟打我兵鼓勇力戰致
有傷亡雲南臨元鎮標中營把總張彩雲候補把總

武舉王恩詔左營千總張世成署千總事右營把總
石貴右營額外常顯仁世襲雲騎尉薛大經開化鎮
標署千總合永平把總李逢春候補把總馬良春外
委張應星額外易閏昌奮不顧身衝擊遇害均堪憫
惜著該部分別議卹其陣亡兵勇士練著照例咨部
辦理又護上思營都司雷振坤上年在那鄉五塘之
那隆剝江村適遇股匪被團練堵捕上前協拏殲斃
賊匪數名餘匪逃散旋因受傷殞命雷振坤亦著該

部照例議卹欽此

附奏拏獲慶遠賊首張晚片子

再慶遠一帶賊匪經臣向榮疊次追剿竝將賊首張嘉盛陳興晚先後殲擒尙有賊首張晚一名逃入上林遷江各處復經會飭嚴密查拏茲據慶遠府知府鄭瑞麒稟報奉飭訪拏賊首張晚當經督屬會營懸賞購得線目阮玉協同臣向榮派撥壯丁范愈廷等暨該府同知曾紹珪差撥民壯馮殿魁朱德隆等竝永順土司生員鄧步衢鄧祖顯等

於上年十二月十一日查至思恩府屬武緣縣安定土司所轄加延地方探悉該犯張晚潛匿馬隴山峒當卽密令村民四面圍截適署河池州知州鄧樹榮等亦經各撥兵役同時協力將該犯張晚擒獲解府訊據供認攻偏河池州垣及聚擾宜山德勝等處不諱稟候批示押解前來臣等查該犯張晚恃衆攻劫疊抗官兵實屬罪大惡極當飭就近解赴臣李星沅行營審明卽將該犯凌遲處決

竝此次出力之官紳壯丁查明分別核實優獎又
梧州府屬積年巨盜鄧立奇屢犯搶劫在逃未獲
節經臣等嚴飭查拏茲據梧州府知府湯俊稟報
前赴所屬藤縣查辦盜匪署知縣周克錦面稟訪
聞該犯鄧立奇等現在逃匿十都地方當卽會督
營委各員密帶兵練迅速馳往將該犯鄧立奇格
傷拏獲另獲匪犯蒙明希等二十名卽經遵批解
赴臣勞崇光行營親提該犯鄧立奇審明正法該

府縣訪獲巨盜緝捕尙屬認真亦卽分別獎勵除
仍飭各屬文武實力分途搜捕匪黨不准稍畱餘
孽外謹會同兩廣總督臣徐廣縉合詞附片具

奏伏乞

聖鑒訓示謹

奏

硃批知道了欽此

附奏丁憂知縣豐安畱營差遣片子

再粵西剿捕喫緊各路差遣之員查有前署象州知州事卽用知縣豐安係內務府正白旗漢軍人道光三十年二月十五日在省丁憂應於丁憂之日起例限六箇月起程回旗扣至八月十五日限滿茲因差遣需人暫畱襄辦軍務應俟軍務事竣再令請咨回旗守制據署藩司吳鼎昌署臬司楊彤如會詳前來除咨明吏部知照外謹會同兩廣

督臣徐廣縉合詞附片具

奏伏乞

聖鑒訓示謹

奏

硃批依議吏部知道欽此

縷陳慎密籌勦金田逆匪事宜並奉到

欽差大臣關防日期片子

再桂平縣屬之金田村會匪負隅不法拒傷貴州
將弁前經署撫臣會摺奏報臣行抵柳州復與提
臣等悉心函商札調滇省官兵合黔楚官兵併力
籌剿亦經恭摺奏

聞在案提臣甫自貴縣馳抵潯郡滇兵由南甯應調歲
杪始能到齊積雨連旬兵力稍乏且該匪聚集人

數實有萬餘官兵六千不及其半所請廣東潮州
兵昨准督臣來函尙未允撥不能不兼用壯練賊
中黨與協從必須權宜解散先經臣密派告養在
籍之前任陝西知縣李熙筠等馳往會商購線設
法離間准令夥匪自新竝許給重賞令其斬擒賊
首前撫臣鄭祖琛復由省城與在籍翰林龍啟瑞
商派籍隸桂平之教官陳丕齡等馳回妥辦卽日
當有端倪至賊巢倚山近江內接平南花洲縱橫

數十里各口均藏槍礮掘有陷坑迴非羣盜竄擾
可比前次黔兵之失轉在一往無前提臣勇敢過
人但使時會可乘斷不稍存觀望惟該匪地險人
衆自應厚集兵力多方布置以期一鼓殲擒溯查
金田在前明時韓雍平侯大苟於此用兵十六萬
人右軍從武象攻其北左軍從桂平攻其南腹背
夾擊始獲奏捷蔡經平侯公丁於此亦用兵五六
萬人仍分左右軍爲兩翼賊且漫走山谷官兵疲

於追拏事載廣西省志以今視昔難易較然現在
大兵會潯提臣商定策遣鄉導以悉賊徑偵探以
識賊踪該匪糧草火藥近因鄰境堵截似覺不敷
亟盼天氣放晴人事順應官兵全力攻剿壯練分
段兜擒仰仗

皇威及早決勝餘匪望風膽落當可次第翦除又平南
地居下游疊飭在事文武添派兵勇扼要防堵其
象州修仁兩處切近桂平亦經飭委丁憂尙未回

旗之知縣豐安在籍投効之原任四川直隸州知州朱紹恩分往幫辦以冀堵禦得力所有愼密籌剿事宜謹附片縷陳伏乞

聖鑒訓示再道光三十年十二月二十二日由兩廣督

臣徐廣縉委員賁到

欽差大臣關防臣謹卽叩謝

天恩祇領開用合併附陳謹

奏

硃批另有旨欽此

會奏官兵進勦金田逆匪

追賊遇伏請將傷亡弁兵議卹摺子

奏爲金田大股逆匪現經臣向榮統帶官兵壯勇直抵賊巢剿殺賊匪數百名因該匪暗伏地雷弁兵奮勇攻剿致有傷亡現俟天色晴霽再行併力夾攻迅期剿滅恭摺由驛奏祈

聖鑒事竊查桂平縣屬金田逆匪竄踞大黃江人數萬餘抗拒不法前經臣等調派滇黔楚及本省官兵擇要併力籌剿恭摺奏

聞在案臣向榮先由橫州督帶楚兵二千名抵潯雲南

臨元鎮總兵李能臣亦帶滇兵二千名於正月初

趕到時值春雨連綿道途泥淖賊巢環山繞澗未

便輕易進兵至正月十四日天始稍霽臣向榮卽

與滇黔將領及署臬司等會商派候補知府劉繼

祖帶水勇數百名署陸川縣知縣張琳等帶鬱林

各處壯勇一千二百名由水路石嘴順流直下訂

期夾攻其餘滇黔楚三省官兵各二千名統歸臣

向榮督帶卽由平南進發十五日拔營渡河十六日抵平南派參將成安游擊福謙帶本省兵勇及楚勇千餘名參將丁振剛帶督標兵丁三百名同知英秀帶勇六百名分路前進十七日齊抵馬鹿嶺紮營離賊巢十五里一面布置撥兵在各要口堵截十八日黎明整隊會督臨元鎮李能臣署鎮遠鎮周鳳岐管帶大兵齊至佛子嶺分隊進剿楚兵居中滇兵及東西兩省兵壯居左黔兵居右一

同進攻連過山溝數道直抵大黃江岸之牛排嶺
該匪紛持槍礮約分九股迎敵勢甚猖獗我兵一
見匪衆人人切齒鼓勇直前連環施放槍砲刀矛
並擊該匪亦放大砲回拒自辰至午轟斃賊匪二
百餘名賊分兩路衝撲暗襲我兵之後又經副將
王錦繡和春參將德安成安等督率官兵截殺並
經滇兵及東西兩省兵壯拋擲火具燒燬賊巢房
屋多間賊勢稍挫紛紛怯退並委棄砲械等件我

兵乘勢進追向前力擊該匪於賊巢附近暗伏地雷登時火發致傷弁兵當卽傳令速退該匪復分兩股從左右竹林蜂湧抄截官兵奮力衝殺連開鎗砲又斃賊匪數十人因見賊巢堅固一時未能攻破暫於近處扼要紮營查點各營官兵內有候選衛守備王崇山千總湯成光等均經受傷陣亡雲南署游擊王國才腿受矛傷飭醫調治候補知府劉繼祖督帶水路壯勇由石嘴至大黃江鬱林

壯勇由官塘陸路分投進剿自午至未互相衝擊
斃匪數十名賊勢稍却又因兵壯尾追衝出力戰
水陸互爲援應賊始退竄回巢兵壯仍在官塘一
帶駐紮查該匪恃衆負固節經臣等設法解散嚴
禁接濟陸續潰逃者不止千人竝疊次拏獲賊探
收審而強寇數仍盈萬據險亡命兇狡異常我兵
敵愾同仇憤恨切齒爭先鏖戰當卽殺賊數百名
逆鋒業已稍挫各弁兵奮勇追剿直搗賊巢不期

暗伏地雷致有轟傷雖據水陸兵壯兩次夾擊復斃賊匪多名而賊衆深溝高壘仍卽堅守不出粵西交春以後積雨數旬泥深尺許山徑頗難著力現在激勵將士熟審地形一俟天晴路乾卽行偪近攻剿至附近潯州一帶誠恐賊夥分竄府城畱守兵壯本有一千四百名臣李星沅復由柳州行營添派官兵五百名馳往竝飭鬱林壯勇一千名撤回上游協同防堵策應復密札桂平武宣貴縣

各傳團練隨赴大營進剿臣周天爵現在省署添
備軍械擬俟雇勇到齊再行管帶出省務期分堵
合戰迅掃賊氛以申

天討所有此次打仗陣亡之投効武進士候選衛守備
王崇山雲南撫標把總李茂貴州鎮遠鎮標署把
總事外委吳大經外委李光燧朗洞營外委嚴發
成湖南乾州協署千總事把總王薦魁兩廣督標
千總湯成光把總洗蛟外委伍佐邦廣西柳州營

把總張秉政新拔賓州營經制外委王慶光撫標
武舉劉正彪均能冒險追賊奮不顧身洵堪憫惜
應懇

聖恩一併飭部議卹其餘傷亡兵壯另行彙案咨部所
有金田大股逆匪現經官兵追剿殺賊數百名弁
兵亦有傷亡擬俟天色晴霽再行設法進攻緣由
謹會同兩廣督臣徐廣縉合詞恭摺具

奏伏乞

皇上聖鑒訓示謹

奏 咸豐元年正月二十八日具

奏奉

硃批另有旨欽此

會奏右江官兵剿捕上龍土司賊匪獲勝竝派員
剿辦都結等土州股匪摺子

奏爲龍州承審之上龍土司大岸地方官兵剿捕賊
匪殲擒多名竝永康州承審之都結佶倫等土州
境內亦有賊匪奔竄現派文武各員剿辦恭摺由
驛具

奏仰祈

聖鑒事據右江鎮惠慶咨開道光三十年十一月二十

李文恭公奏議

卷二十一

便粵

七

三日龍州承審之上龍土司與江州思州交界之
亭亮墟有廣義堂大夥賊匪滋擾經該鎮道商派
淮陞右江鎮標左營都司馬東旭帶兵六百名崇
善縣知縣世忻帶勇三百名會同護新太協副將
事遊擊謝升恩帶兵二百名前往剿捕於十一月
二十六日行至馱棉途次探報賊匪已由亭亮退
至大岸佔踞三崱該處叢山峭壁中有羊腸小徑
行走僅容一人該匪於崖顛壘石設礮以守我兵

勢難進攻該文武公同密計隨派兵壯數十名虛
張旗幟以爲疑兵使賊不敢由山嶺折回馱棉襲
我後路十二月初四日夜間派委署千總戴玉魁
帶領左江兵丁一百五十名新太兵丁五十名馱
盧司巡檢賈中孚帶領道府縣壯勇二百名由陸
路直抵大岸對河誘賊出巢復令署守備楊致英
千總會朝玉等帶領兵壯由水路逆上趕至大岸
下游以備兩面夾擊初五日黎明署千總戴玉魁

等先至大岸對河該匪等突出數百人搖旗鳴角
隔岸放礮抗拒戴玉魁賈中孚先期密飭兵壯於
土坎後隱伏俟其過河半渡突出轟擊派撥已定
該匪見兵壯不動果由淺處過河兵壯鼓勇而上
鎗礮齊施打斃賊匪二十餘人賊匪旋回對岸謝
升恩等飛督後路官兵趕到復擊斃賊匪二十餘
人賊始退去楊致英等正在由船登岸忽於甘蔗
園內衝出賊匪二百餘人當經兵壯礮斃數十名

楊致英手刃執旂賊目二名曾朝玉賈中孚各砍斃一名該匪見官兵勇銳遂各翻山逃散我兵奮力追擊直抵賊巢拋擲藥罐燒燬屯賊茅棚數十間生擒蒙世梅等十三名奪獲刀矛數十件時已昏暮未便窮追查驗官兵均無傷失惟狀丁黃勝被賊礮傷右手現飭醫治當卽就地紮營次日黎明探報賊匪連夜分竄土司州一帶而去正擬跟蹤追剿又據探得羅白土縣邊界另有大股賊匪

竄由忠州那寮等處相距郡城甚近卽商同刻速帶兵於初八日回郡堵守等情又據署左江道彭煥署太平府知府吳得徵稟報探聞上龍土司與甯明州交界之窩頭等處有大夥賊匪約一二千人由明江邊界竄擾都結佶倫等土州地方亦有賊匪數千人從隆安一帶竄入將赴龍英土州屬境攻掠等情查都結佶倫等土司均在太平府屬該府境內共土司十餘處地方遼濶山徑相通現

在官兵剿捕緊嚴該匪等奔竄土境急應設法捕
拏免致藏匿爲患當由臣等飛飭先經委往太平
駐守之右江鎮惠慶會督營員竝該管道府漢土
各官帶領兵壯團練馳赴都結等土屬探明賊蹤
痛加剿洗又飛調該管左江鎮德亮帶領兵壯一
千名星夜馳往相機會剿務將各匪剋期悉數殲
除以安邊境一面飭提現獲之梅世蒙等嚴審確
情將抗官拒敵各犯先行就近正法以昭炯戒所

有剿捕上龍土司大岸賊匪官兵得獲勝仗並現
派文武各員剿辦都結等土州股匪各緣由謹會
同兩廣總督

臣徐廣縉合詞恭摺具

奏伏乞

皇上聖鑒訓示謹

奏
咸豐元年正月二十八日具

硃批另有旨欽此

會奏南甯太平梧州

修仁貴縣柳城來賓武宣等處拿獲匪犯片子

再盜匪聚散無常必令寬渠授首餘黨較易殄滅
節經臣等嚴飭各屬一律上緊查拏茲據署南甯
府知府鄒嶧杰稟稱道光三十年十一月初十
七等日賊匪竄擾隆安卽經會同營員帶領兵壯
在隆安縣屬之凌村地方擒獲凌俊青等九名並
搜獲砲械多件該文武乘勢追剿復至那重村殲
斃賊匪三百八十餘名餘匪逃竄兵壯亦有損傷

業經開單呈報內有賊首杜建達一犯當因傷重
身死查驗屬實照例戮屍又據署太平府知府吳
德徵稟稱前獲匪犯蒙世梅等十三名又另案拏
獲匪犯黃亞陳一名督縣研訊據黃亞陳供認隨
同潘大等匪擁入龍州廳署該犯用刀砍傷同知
王淑元右肩膊不諱實屬罪大惡極當卽隨同鎮
道將該犯黃亞陳凌遲處死割取心肝致祭同知
王淑元以慰忠魂竝訊明蒙世梅曾入龍州廳署

刦殺餘皆上龍土司等處滋擾之犯亦經鎮道覆
審卽行正法又據梧州府知府湯俊稟稱前獲巨
盜鄧立奇一犯已奉

奏明處決茲復督屬獲犯多名內有巨盜鄧亞八林

亞三二名均係奉

旨飭拏之犯又黎長頭二等三十名及前獲蒙明希等
二十名亦係迭刦拒捕要犯又據署修仁縣知縣
寶善報獲巨盜嚴亞汶一犯係在宜山來賓遷江

等縣豎旗糾黨肆擾之首匪均經前署撫臣勞崇光審明正法梟示又據署貴縣知縣張汝瀛稟報來賓案內大夥賊首文亞英遷江案內大夥賊首徐亞汶卽徐亞雲均保奉

旨飭拏之犯該縣於本年正月初九十四等日先後會督兵練將文亞英徐亞汶二犯生擒並獲徐亞汶之子徐亞長等訊取確供解赴臬司行營收審另獲匪犯姜見孫黃十二等十三名訊係搶劫抗拒

官兵之犯及續獲黃三被等二十九名俟審定後
詳辦又據署柳城縣知縣魏金聲稟報該縣洛崖
牛領村近有賊匪廖匿當飭文武管帶兵勇馳剿
殲斃賊匪數十名拏獲黃添應等四十餘名就近
解赴中李星沅行營審辦又據署來賓縣知縣趙
啟昀稟報續獲匪犯江大脚二等十三名署武宣
縣知縣劉作肅稟報續獲匪犯及金田賊探曾建
幅等三十五名均分飭嚴審詳解除獲犯出力之

兵壯團練_臣等督同藩司勞崇光先行從優獎賞
仍飭各屬實力窮搜務將指名單開巨匪殲擒淨
盡毋使一名漏網外查糾夥滋擾首要各犯現經
各州縣隨時隨處設法購線訪拏迭次報獲生擒
緝捕尙屬勤奮容再分別核實另摺保

奏祇候

恩施以示鼓勵謹會同兩廣督_臣徐廣縉合詞附片彙
陳伏乞

聖鑒訓示謹

奏

硃批另有旨欽此內閣奉

上諭李星沅周天爵向榮奏進剿金田逆匪情形竝上
龍土司等地方剿匪各一摺又片奏各屬擒獲匪犯
等語廣西桂平縣屬金田逆匪竄踞大黃江一帶地
險人衆經提督向榮等督飭文武弁兵合力進攻於
正月十八日直抵賊巢該匪執持鎗礮分股迎敵我

兵鼓勇直前連環攻擊自辰至午轟斃賊匪二百餘名竝拋擲火具燒燬賊巢房屋多間乘勢進追該匪暗伏地雷復敢左右抄截經官兵奮力衝殺連開鎗礮又斃賊匪數十人其由別路進攻之水陸壯勇復分投攻剿殺斃數十名該匪退竄回巢負嵎固守所有陣亡之投効武進士候選衛守備王崇山雲南撫標把總李茂貴州鎮遠鎮標署把總事外委吳大經外委李光煜朗洞營外委嚴發成湖南乾州協署千

總事把總王薦魁兩廣督標千總湯成光把總洗蛟
外委伍佐邦廣西柳州營把總張秉政新拔賓州營
經制外委王慶光撫標武舉劉正彪均能冒險追賊
奮不顧身洵堪憫惜著該部照例議卹至龍州之上
龍土司一帶有大批賊匪滋擾經該鎮道選派文武
督帶兵壯分路夾擊殲擒匪犯多名署守備楊致英
於賊匪衝出抗拒之際手刃執旂賊目二名賊始潰
散奮勇可嘉永康州之都結佶倫等土州地方亦有

賊匪奔竄現已派兵馳往剿捕務須嚴密搜拏勿任蔓延其南甯府文武於隆安縣境剿斃賊匪三百八十餘名並將賊首殲斃太平梧州等府修仁等縣疊經拏獲戕官要犯及曾經降旨飭拏各犯多名分別正法辦理尙屬認真所有獲犯出力各員及兵練等均著查明核實保奏候朕施恩餘著照所擬辦理該部知道欽此

會奏遵

旨保舉湖南隨剿將備弁兵及糧局文員摺子

附清單

奏爲欽遵

諭旨查明湖南隨剿將備弁兵奮勇出力并糧局文員

先懇

鴻慈獎勵以示激揚恭摺仰祈

聖鑒事竊臣向榮於道光三十年十月十五日馳抵柳

州接印卽於十月三十日十一月初四十五二十

六等日親督湖南官兵二千名帶同糧臺委員馳
剿大股賊匪在慶遠府屬之索潭獨山及遷江縣
屬之陶鄧墟橫州屬之陶墟四次接戰均獲全勝
殲擒首要各犯賊黨次第剪除疊經恭摺

奏報在案嗣於十二月十七日奉

上諭向榮甫經到粵卽能身先士卒激勵將弁實屬忠
勇可嘉其武緣賓州等處此次出力員弁及紳民團
練人等著李星沅周天爵勞崇光向榮等查明具奏

候朕施恩等因欽此又於正月初七日奉

上諭向榮馳奏督剿橫州大夥賊匪得獲勝仗一摺向
榮督兵轉戰一月之間四獲勝仗洵屬奮勇可嘉著
先行交部從優議叙此次打仗出力各員弁兵練竝
前次索潭墟等處連獲勝仗實在出力人等一併查
明會商李星沅等分別據實保奏候朕施恩等因欽
此臣等跪誦之餘曷勝欽感伏查廣西地方遼濶
賊匪股數實繁臣等酌量後先正在力圖攻剿惟

湖南官兵自隨臣向榮入粵分投擊賊勇敢爭先
一月之間四獲勝仗柳慶思恩一帶賊頗望風知
畏良由諸將用命士卒精強臨陣衝鋒一鼓作氣
是以有戰則克頓挫逆氛本省紳民莫不指爲勁
旅自應欽遵

諭旨先行查明甄叙俾得早沐

天恩藉以鼓舞戎行同深敵愾實於軍務有益臣等分
案飭查除將四次打仗勞績稍次者列冊存記隨

時獎拔咨部外其尤爲奮勇出力之將備弁兵及糧局文員先具事實清單酌核據實保

奏祇候

恩施至武緣賓州及疊次隨剿出力員弁紳民團練人等均經遵

旨分飭在事文武核實查開勞績另行恭摺

奏獎所有湖南隨剿將備弁兵及糧局文員先行甄敘緣由謹會同兩廣督臣徐廣縉合詞恭摺由驛

具

奏伏乞

皇上聖鑒訓示謹

奏 咸豐元年正月二十八日具

奏奉

硃批另有旨欽此內閣奉

上諭李星沅周天爵向榮奏遵查湖南隨剿將備弁兵
並辦理糧局各員懇請獎勵開單呈覽一摺此次粵

西賊匪分股剿捕一月之間四獲勝仗當令李星沅等查明保奏茲據奏稱該弁等臨陣衝鋒逆氛頓挫實屬奮勇出力自應量予恩施以昭激勸湖南永綏協副將和春著賞戴花翎提標前營都司楊勇巴圖魯鄧紹良著以游擊儘先升用鎮筸鎮標前營藍翎都司鄭魁士桂陽營藍翎守備陳明志均著賞換花翎辰沅道標藍翎千總米興朝田宗揚鎮筸鎮標右營藍翎千總胡俊均著以守備儘先升用提標右營把

總陳定富鎮筭鎮中營藍翎把總熊廷勲右營藍翎
把總包順科均著以千總儘先拔補新拔乾州協右
營千總周維新常德協把總梅山繼鎮筭鎮前營外
委田峻乾州協外委張天得保靖營外委殷永福常
德協額外李九成鎮筭鎮標右營額外田慶仁永綏
協額外舒蘭保靖營額外田宗南河溪營額外聶永
楨竝兵丁貴廷方等五十九名均著賞戴藍翎鎮溪
營額外徐統勲著以把總儘先補用已革藍翎外委

丁永貴著仍以藍翎外委儘先拔補同知銜署廣西
慶遠府同知北流縣知縣曾紹埕著開知縣本缺以
同知直隸州補用鎮安府向武土州州判王樂實著
賞給六品頂帶太平府佶倫土州吏目倪韶書著俟
邊俸期滿以州判遇缺卽升餘著照所擬辦理該部
知道單併發欽此

謹將湖南隨勦尤爲出力之將備弁兵及帶同糧
臺文員開列事實清單恭呈

御覽

湖南永綏協副將和春帶兵入粵四次接仗身先
士卒扼要指揮奮勇攻勦不遺餘力擬請

賞戴花翎

湖南提標前營都司楊勇巴圖魯鄧紹良

湖南鎮筸鎮標前營藍翎都司鄭魁士

湖南桂陽營藍翎守備陳明志

該三員疊次帶兵追剿不避艱險殺賊多名鄧
紹良請以遊擊儘先升用鄭魁士陳明志均擬
請

賞換花翎

湖南辰沅道標藍翎千總米興朝新拔乾州協右
營千總周維新

該二員屢次打仗緊偏賊巢殺賊多名米興朝

擬請以守備儘先升用周維新擬請

賞戴藍翎

湖南鎮筵鎮標右營藍翎千總胡俊辰沅道標藍翎千總田宗揚提標右營把總陳宗富鎮筵鎮標中營藍翎把總熊廷勳鎮筵鎮標右營藍翎把總包順科

該五員奮勇當先疊次殲擒賊匪多名胡俊田宗揚擬請以守備儘先升用陳宗富熊廷勳包

順科擬請以千總儘先拔補

湖南常德協把總梅占魁鎮筸鎮標前營外委田
駿乾州協外委張天得保靖營外委段永福常德
協額外李九成鎮筸鎮標右營額外田慶仁永綏
協額外舒蘭保靖營額外田宗南河溪營額外聶
永楨

該九員疊次追剿賊匪殲擒多名均擬請

賞戴藍翎

湖南鎮溪營額外徐統勲打仗殺賊多名擬請以
把總儘先補用

已革藍翎外委丁永貴打仗殺賊二名並往加炎
偵探拏獲賊匪溫三等十一名割獲首逆張嘉盛
首級一顆擬請仍以藍翎外委儘先拔補同知銜
署廣西慶遠府同知北流縣知縣曾紹程經理糧
局鈎稽詳慎並首先訪獲首匪張嘉盛一名又會
獲首匪王玉珍張晚二名夥匪四十餘名實屬不

辭勞瘁可否請開知縣本缺以同知直隸州補用
鎮安府向武土州州判王樂實太平府佶倫土州
吏目倪韶書幫辦糧臺文案採運糧米接濟晝夜
辛勤王樂實擬請

賞給六品頂戴倪韶書請俟邊俸期滿以州判遇缺卽
升

湖南提標中營兵丁貴廷方右營兵丁王士英陳
玉喜前營兵丁姚洪春蕭開雲常德協兵丁羅振

升鎮筵鎮標前起兵丁劉上賓侯大有熊進滕加
友胡占敖後軍兵丁楊光有唐天祥左營兵丁林
茂然宗星考楊心純田康右營兵丁向科富邢成
清金光榮前營兵丁聶永珍戴廷秀廖興棟鎮筵
鎮標一起兵丁蔣立勇曹興隆包占元詹雲全裴
光裕滕成富後軍兵丁劉長培左營兵丁胡勝永
右營兵丁滕代升永綬協兵丁吳再升熊天喜楊
兆瑞侯定貴馮得明陳昌達林從文乾州協兵丁

李榮升林從根張漢成韓天瑞鎮溪營兵丁向顯
亮孫紹凱河溪營兵丁祝士亮楊再良保靖營兵
丁黃金友安炳臣向方得王傳訓羅朝興辰沅道
標兵丁滕喜明梁有芳陳宗魁陳開業劉福祥劉
士發陳開榮

該兵丁五十九名均係隨同打仗最爲出力擬
請

賞戴藍翎

附奏保舉桂平縣知縣李孟羣團長黎建勲黎緝熙拏獲陳亞潰出力片子

再臣等欽奉

上諭頃據徐廣縉奏稱廣西署桂平縣知縣李孟羣係首先督同團長將賊首陳亞潰拏獲鄭祖琛前奏亦稱密札顧元凱李孟羣等督捕著李星沅再行確查等因欽此臣李星沅查賊首陳亞潰先在賓州黃練一帶經官兵壯勇迭次轟擊追剿夥匪殲擒殆

盡陳亞潰勢孤力竭逃入桂平縣屬之羅淥山崗
團長生員黎建勲經該府縣密飭截拏當卽探明
賊踪偕其子廩生黎緝熙首先將陳亞潰生擒各
委員兵練併將陳亞潰之弟陳火交擒獲其爲黎
建勲首功確鑿可據黎建勲擬請

旨賞給六品頂戴並

賞戴藍翎以知縣歸部選用黎緝熙擬請

旨賞給六品頂帶以訓導遇缺儘先選用該府縣於賊

首陳亞潰竄入本境卽經督飭團長黎建勲跟踪
緝獲督臣徐廣縉及前撫臣鄭祖琛所奏相符潯
州府知府顧元凱已蒙

恩免其革職署桂平縣知縣李孟羣本係

賞戴花翎以同知補用之員擬請

旨以同知遇缺儘先補用其餘在事出力文武員弁紳
民等容再確查分案

奏獎至武緣隨剿各團練臣等奉

旨飭查前撫臣鄭祖琛因附片彙敘各案所開團練姓名與督臣徐廣綬專摺具奏互有詳畧而情事則無不同所有武緣縣奮勇出力之團長廩生蘇芝杰李棟林增生李向榮生員鄧超棠甯明遠武生李美星李可芳李允標職員韋最精韋珠明均擬請給六品頂帶童生黃克明李元綱均擬請給八品頂帶以示鼓勵此外各屬團練隨同官兵奮勇出力者甚不乏人節經臣等札飭核實單開毋許

稍涉冒濫惟地方遠近不等人數多寡不等勞績
大小不等各屬陸續具報尙須詳加酌核另案彙
摺具

奏謹合詞附片縷陳伏乞

聖鑒訓示謹

奏

祿批另有旨欽此內閣奉

上諭李星沅等奏遵查剿賊出力之官紳團練請加獎

勵等語據奏賊首陳亞潰先由賓州黃練一帶逃入

桂平縣屬之羅淦山崗團長生員黎建勲經府縣密

飭截拏當卽探明賊踪偕其子廩生黎緝熙首先將

陳亞潰生擒各委員兵練併將陳亞潰之弟陳火交

擒獲實屬奮勇出力黎建勲著加恩賞給五品頂帶

並賞戴藍翎以知縣歸部卽行選用黎緝熙著賞給

六品頂帶以訓導遇缺儘先選用署桂平縣知縣李

孟羣著以同知遇缺儘先補用其武緣縣隨剿奮勇

出力之團長廩生蘇芝杰李棟林增生李向榮生員
鄧超棠甯明遠武生李美星李可芳李允標職員韋
最精韋珠明均著賞給六品頂帶童生黃克明李元
綱均著賞給八品頂帶以示鼓勵餘著照所擬辦理
該部知道欽此

附奏請獎廕生向繼雄隨營出力片子

再提臣向榮之子一品廕生向繼雄自隨提臣入
粵於索潭獨山陶鄧墟陶墟等處奮勇接戰連獲
勝仗又協同委員密派兵壯拏獲大夥首匪張嘉
盛王玉珍張晚三名並奉委幫辦糧臺研鞫賊犯
均能任勞任怨不遺餘力據湖南隨剿各將官聯
名稟請列摺保奏前來提臣向榮以父子受

恩深重分應同時報効斷不肯與將士論功臣等伏查

該廕生前隨提臣在湖南新甯縣生擒首逆李沅
發案內經湖廣督臣奏請鼓勵欽奉

上諭向繼雄著俟赴部引見時再降諭旨該部知道等
因欽此現至粵西投効復能勇往認真加倍出力
當鼓舞人材之際未敢壅於

上聞可否將該廕生向繼雄

賞戴花翎以示獎敘之處出自

聖主逾格

鴻施謹會同兩廣督臣徐廣縉合詞附片保

奏伏乞

聖鑒訓示謹

奏

硃批另有旨欽此內閣奉

上諭李星沅周天爵奏請將隨營効力之廕生鼓勵等語廣西提督向榮之子一品廕生向繼雄前在湖南軍營經湖廣總督保奏當降旨俟引見時再降諭旨

茲據該大臣等奏稱該廕生現在粵西投効復能勇
往出力自應卽沛恩施向繼雄著賞戴花翎以昭激
勸該部知道欽此

附奏藩司勞崇光仍駐梧州片子

再藩司勞崇光現已交卸撫篆應卽飭回本任因梧州近接桂平正當多事之秋自須照舊駐劄以資鎮定臣周天爵業經

奏明在案伏查該藩司係節次奉

旨籌剿之員地方情形熟練所有一切軍務及會查奏報要件臣等仍督同密商核辦俟桂平剿匪事竣該藩司或須移營他處容再隨時籌酌合併陳明

伏乞

聖鑒謹

奏

硃批是欽此

懇撥軍餉八十萬兩摺子

奏爲粵西軍務吃緊各省兵勇雲集餉糈支用浩繁

籲懇

天恩勅部寬爲籌撥以資接濟恭摺奏祈

聖鑒事竊查廣西軍興已逾半載始則防勦兵勇本省
居多迨後湖南雲南貴州客兵相繼而至並募閩
勇廣勇獠勇等一切軍裝器械糧餉夫馬逐漸加
增需用日鉅臣李星沅奉

命會同籌勦於上年十二月甫抵桂林查悉奉撥軍餉
四十九萬有奇業已支放殆盡當經附片陳

奏旋據署藩司詳請續撥卽經_臣等奏奉

恩旨戶部速議具奏竝

諭令徐廣緒於關稅等款內先行籌撥二三十萬兩迅
解粵西軍營等因欽此_臣等曷勝欽感惟據督_臣徐
廣緒來函以東省現辦防勦需費亦多庫款籌撥
爲難先行飭司撥解銀十萬兩至蒙

勅諭戶部指撥何省尙未接准文行查粵西軍務正當
喫緊之際滇黔楚各省官兵現均調至平南攻剿
金田逆匪初擬兵力厚集刻日殲除詎該匪人數
衆多據險負固仍須相機妥辦一時尙難戴功而
兵勇雲集大營所費不貲其餘南太等屬警報頻
聞需兵甚殷望餉亦切思恩慶遠柳州梧州各糧
臺及省城軍需總局支應餉項爲數甚繁茲據署
藩司吳鼎昌詳稱上年十二月底止實由司庫支

發銀六十五萬有零內除前撥四十九萬七千兩
儘數支用外尙於地丁正項及解部減平各款內
借支銀十五萬三千七百餘兩又自正月初二日
截至現今止解赴潯州南甯柳州平樂各糧臺共
銀二十一萬五千五百餘兩因司庫不敷動借復
撥鹽道庫西稅等銀九萬三千二百餘兩現經奉
旨敕撥東省僅解銀十萬兩其餘二十萬兩急望奉撥
來粵又本省各營本年夏秋俸餉例於春間支放

需銀二十餘萬兩加以支放存留各項均關緊要
實屬無款可籌至本省分局收捐尤慮緩不濟急
詳請

奏明懇

恩敕部寬爲籌撥餉銀八十萬兩俾免貽誤等情前來
臣等查軍行首重糧餉粵西股匪歧出各路均須
勦辦大功底定計尙需時且地方僻處西隅著名
瘠苦司庫正雜各款向來存貯無多近因軍需緊

急庫款墊發已空前請三十萬兩卽全數撥解到
省尙不足兩月之用且司庫先墊各款勢不能歸
則應支俸餉存留一無所出若不通籌全局斟酌
緩急情形及早據實奏

聞請撥大餉誠恐輾轉解運延誤事機所繫綦重臣周

天爵甫抵省城日與臣李星沅同深焦慮復偕藩

司勞崇光函商極知

帑項攸關臣等具有天良何敢再三瀆請上煩

聖聽無如時事所迫必不能已惟有籲懇

天恩俯念軍需緊要

敕部再於附近各省籌撥餉銀八十萬兩迅速批解來
西以資轉運臣等仍當飭司嚴督糧臺各委員覈
實勾稽撙節支用務使餉不虛糜事竣核實報銷
如有盈餘造冊報部候撥所有粵西軍務支用浩
繁急應寬爲籌備以資接濟緣由臣等謹會同兩

廣督臣徐廣縉合詞恭摺由驛馳

奏伏乞

皇上聖鑒訓示謹

奏 咸豐元年二月初六日具

奏奉

硃批另有旨欽此內閣奉

上諭李星沅周天爵奏請飭部寬爲籌撥軍餉一摺著
戶部速議具奏欽此

週

旨查復已革提督閔正鳳總兵盛筠在任情形摺子
奏爲遵

旨確切訪查據實恭摺覆

奏仰祈

聖鑒事竊查前奉

諭旨已革廣西提督閔正鳳畏葸無能交臣李星沅逐
加訪查務令水落石出據實覆奏又於道光三十年

十一月二十日奉

上諭前任廣西左江鎮總兵盛筠畏蕙無能又先期告
病規避取巧著卽革職與已革提督閔正鳳一併交
李星沅徐廣縉確查有無別項劣跡據實參奏各等
因欽此查前任廣西提督閔正鳳畏蕙無能種種
玩誤先經臣徐廣縉於上年九月間查明據實參
奏欽奉

諭旨革職臣李星沅銜

命抵粵卽經密切詢訪旋來柳州暫駐提督衙署復將
閔正鳳在任情形詳細確查僉稱粵省自前年以
來盜風漸熾該提督雖經調派弁兵分投剿捕無
如兵力怯弱不能禦賊軍械復不適用上年五月
賊匪竄至馬平縣屬大發墟搶劫典舖距府城僅
數十里該提督安坐衙齋並未親往督捕迨官兵
在都咸堡打仗陣亡弁兵多人該提督仍未渡河
救應又上年八月賊擾修仁荔浦兩縣匪首陳亞

潰等旋被兵練擊走該提督移駐象州自應扼要
堵截乃僅拘守州城一任匪首陳亞潰竄入武宣
幾至漏網經臣李星沅徧加訪察衆口同聲查該
提督身任武職一品大員全省營伍皆其統制平
時旣未能嚴飭操防修整軍械以冀挽回積習直
至盜匪竊發相距不遠又不親身督剿泄沓苟安
雖查無別項劣跡而畏葸無能種種玩誤實屬負

恩溺職相應遵

旨查明據實覆

奏前任左江鎮總兵盛筠平時辦事本少實心鎮標

弁兵亦難得力經

臣

徐廣縉查參業已奉

旨革職咎有應得現在會同確查尙無別項劣跡所有
遵

旨查訪緣由理合恭摺由驛覆

奏伏乞

皇上聖鑒訓示謹

奏 咸豐元年二月初六日具

奏奉

硃批另有旨欽此內閣奉

上諭廣西匪徒滋擾各郡前經降旨將提督閔正鳳革職諭令李星沅徐廣縉嚴查該革員竝已革總兵盛筠貽誤各情茲據李星沅徐廣縉查明覆奏閔正鳳身任提督全省營伍皆歸統制乃於賊匪在府城外肆行搶劫之際安坐衙齋竝不親往督捕迨官兵打

仗陣亡多人仍未渡河救應賊首陳亞潰肆擾修仁
荔浦等縣被兵擊走閔正鳳時在象州竝不扼要堵
截幾至賊首漏網似此養癰貽患退縮無能若不立
予重懲何以勵將材而作士氣閔正鳳著卽發往新
疆充當苦差此時兩粵正當剿捕吃緊如有身歷戎
行有心玩誤該大臣等嚴查參奏必當立正刑誅以
肅軍律寬典不能倖邀也至已革左江鎮盛筠平日
訓練無方臨事又多貽誤本應一併發遣現已病故

著毋庸議欽此

南甯太平路通泗城鎮安邊荒險隘動滋伏莽梧
州鬱林一帶與廣東肇慶高州等屬毗連賊匪乘
隙往來亦無此疆爾界至各文武稟報粵東每云
西匪粵西每云東匪大約東匪多悍西匪多窮或
藉彼強橫號稱廣碼或利此近便熟識打單內外
相因徒黨角立根株久伏萌孽方滋現當西省大
兵均駐潯郡南太各路尙須酌派防剿東省高廉
兩屬剿匪亦駐官兵誠恐鋌而走險仍多暗地勾

結業經_臣等與督_臣徐廣縉互相咨會卽於本省
交界處所嚴飭地方兵練密速堵拏務期合力同
心藉安邊圉以冀上紓

宸注謹附片陳明伏乞

聖鑒謹

奏

硃批另有旨欽此

會奏官兵進剿金田逆匪兩次大勝摺子

奏爲金田大股逆匪現經官兵進攻連日迭獲勝仗
殲斃賊匪一千數百名奪獲砲械無算賊勢漸怯
臣等仍激勵將士相機分堵合剿刻期剪滅恭摺
由驛奏祈

聖鑒事竊查桂平金田逆匪罪惡貫盈自正月十八日
兵勇併力攻剿雖經擊斃數百名而賊黨實繁仍
未大創臣等熟籌機要勉思計出萬全該匪牛排

嶺賊巢深溝高壘中連村落又瀕大黃江水陸均極險要未可輕易進攻臣向榮擇要安營設法固守賊知四路圍剿因於二月初三日在牛排嶺附近之夾州鵝頸等處約七八百人爲一股分竄誘敵臣向榮卽派雲貴官兵各一千名移紮佛子口親率楚兵八百名從大營馳赴夾州一帶搜剿該匪聞風退回僅畱賊夥數十人分守寨門時象州搖壯趕到直前攻擊槍斃賊匪十餘人該匪放

砲抵拒堅守不出卽飭官兵猺壯暫撤以防奸計
詎該匪忽從金匏村擁出一股約二三千人直撲
猺壯營盤並拋擲火藥罐焚燬草寮官兵見賊猝
至施放槍砲一力轟擊該匪復分股來撲大營經
雲南鎮將督令開放大砲轟斃賊匪百數十人雲
南武舉李祥麟奮勇殺賊數名當被賊砲殞命廣
西游擊福謙身先士卒被匪用長矛戳傷右腿適
梧州協兵丁柳肇先搶上立將該匪砍死割取首

級各兵勇奮勇前敵賊始怯退兵壯微有損失日
已薄暮收兵回營臣向榮察看賊情密飭偵探知
連日復將撲營卽傳諭各營准備通夜戒嚴該匪
果於初五日寅刻分作三股每股約四五百人一
由山之西北擁出搖旗持械勢甚兇狠臣向榮暨
雲南總兵李能臣貴州署總兵周鳳岐會督三省
官兵及各路兵將壯勇分隊應敵竝飭廕生向繼
雄管帶所募提勇一千二百名由北面堵截該匪

直撲常德道標及臣向榮營盤其餘大夥盡藏在
正南竹林內助勢臣向榮卽飭官兵壯勇開放槍
砲轟擊該匪亦放大砲回拒彼此交鋒自寅至午
鏖戰五時之久砲子如雨轟斃賊匪無數湖南署
乾州協都司龍金源親燃擡砲傷斃該匪多名被
賊回砲中傷右腿湖南提標外委李九成鼓勇接
戰亦被砲傷腦後當復催督官兵乘勢衝殺槍砲
愈猛卽將身穿紅袍賊首一人及手執藍旗賊目

一人轟斃倒地匪衆遂多潰竄竹林內所藏夥賊
窺見勢已敗怯均各紛紛遁去委棄砲械甚多我
兵追殺六七里生擒數十名卽在軍前斬首其先
後轟擊殲斃及身受重傷沿途倒斃者共計一千
數百人奪獲五六百劬及三四百劬銅鐵大砲十
餘門擡砲擡槍鳥機五子砲三十餘桿刀矛藥丸
擋牌簾牌馬匹及所割首級耳記不計其數時因
兵勇久戰尙未早餐亦卽傳令收回擇其尤爲奮

勇者先給頂帶銀牌並記名獎拔查點兵壯微有
損傷另飭冊報查此股逆匪蟻集蜂屯兇燄甚熾
官兵前有斬獲未卽痛挫賊鋒仰蒙

指授機宜謀定後戰將士同心用命勇壯併力爭先連
日斬馘無數始足明申

天討臣等現仍激揚士氣審視賊巢乘勝亟籌攻洗並
飛飭桂平平南象州武宣貴縣鬱林各處會同營
汛團練嚴防奔突奮力剿擒務期迅掃賊氛上紓

宵旰雲貴督標武舉李祥麟剿賊陣亡懇

恩敕部議卹其餘兵勇彙案咨部所有官兵連獲勝仗

緣由謹會同兩廣督

臣徐廣縉合詞恭摺具

奏伏乞

皇上聖鑒訓示謹

奏
咸豐元年二月十一日具

奏奉

硃批另有旨欽此內閣奉

上諭李星沅周天爵向榮奏剿辦金田大股逆匪疊獲
勝仗一摺又片奏各屬剿匪獲犯情形等語廣西桂
平縣屬金田逆匪自正月攻剿之後尙踞大黃江牛
排嶺等處憑恃險阻經提督向榮四路圍截二月初
三日該逆分股詐誘我兵向榮派雲貴官兵移紮佛
子口親率楚兵馳赴夾洲搜剿逆匪又復詐退從金
匏村出撲猖壯營盤分撲大營經雲南鎮將開礮轟
斃賊匪百數十名梧州兵丁柳肇先立斃長矛賊匪

賊勢少卻同榮准備嚴防慮及該匪另有詭謀果於
初五日賊分三大股擁出當卽督同雲南總兵李能
臣貴州署總兵周鳳岐會督三省官兵及各路兵將
壯勇分隊進攻廕生向繼雄率勇堵其北面該匪又
有大夥伏在正南竹林向榮督飭兵勇鎗礮攻擊自
寅至午斃賊無數湖南署乾州協都司龍金源親燃
擡礮傷斃該匪多名官兵乘勢衝殺將身穿紅袍賊
首一名手執藍旗賊首一名轟斃匪眾潰竄委棄礮

械甚多復又追擒數十名先後殲斃一千數百人奪
獲大礮十餘門擡礮鳥鎗三十餘件刀矛馬匹所獲
無算此次痛剿逆匪大挫賊鋒該大臣等調度有方
鎮將踴躍用命實堪嘉獎向榮自抵軍營以來身先
士卒迭立戰功洵屬有謀有勇不負委任其出力鎮
將弁兵壯勇等著李星沅周天爵向榮查明保奏候
朕施恩所有殺賊陣亡之雲南武舉李祥麟奮不顧
身深堪憫惜著該部從優賜卹至永安州蒼梧縣等

屬分勦賊匪殲獲多名辦理均屬認真所有獲犯出力之員弁兵練等著一併查明核實保奏餘著照所擬辦理該部知道欽此

會奏查復現在賊首股數並請調雲貴官兵摺子

附清單

奏爲遵

旨查復事竊臣等承准軍機大臣字寄咸豐元年正月十八日奉

旨飭查現在賊匪究有幾股每股頭目確係何人並鈔給喬用遷所奏訊出粵西盜匪股數及差探情形一摺臣等公同閱看查粵西地方遼濶羣盜如毛

散則爲民聚則爲寇形迹旣無可辨黨類幾不勝窮卽每股各有堂名各有頭目復有某字某館號票及帶馬買貨名色其暗號或布或線或銅錢半邊或檳榔半箇皆以意爲更換官兵迭次奪獲旂幟圖章字樣亦非一律是以臣等前次

奏報未敢瑣屑開陳如平樂首匪陳亞潰葉添良慶遠首匪覃香晚張晚文亞英思恩首匪鍾亞春嚴亞汝徐亞雲梧州首匪鄧立奇鄧亞八等均經陸

續殲擒附片具

奏賓州匪犯陶八楊撈家大黃江匪犯大頭羊卽張
釗大鯉魚卽田芳上年冬月先後赴營投誠臣向
榮均令殺賊自贖再行核准仍隨時嚴密查察所
有貴州犯供各匪惟鄭廷威黃晚顏大在逃現據
各州縣探報及拏獲匪犯供詞約計賊匪股數賊
首姓名另繕清單恭呈

御覽至金田大股逆匪連村抗拒節據稟報犯供二十

五人爲一旗共二百八十五旗亦有供稱三百旗
並有供稱一千營者確探賊中強寇以及裹脅男
婦總在二萬內外西匪韋正韋元灼東匪洪秀全
卽洪雲山傳爲逆首餘則流匪居多屢經密派紳
民設法解散脅從時有逃歸而內應殊難得手懸
賞未給竝無散匪聞營似不至墮彼奸計正月十
八日官兵接仗後至二月初五日始獲勝仗頓挫
賊鋒而逆黨恃險恃強負隅堅守自宜相機攻洗

未可專以力勝又恐相持日久致失事機臣李星沅擬併移營至潯適臣周天爵至柳面商因南太一路空虛風鶴頻聞暫之重兵分剿誠如

聖明指示恐賊襲我不備臣李星沅仍須駐柳兼籌藉資鎮壓臣周天爵卽往潯州府城駐劄會辦貴州鎮遠鎮總兵秦定三已飭帶兵二百名馳赴平南尙有官兵八百名計日可到惟前調廣東潮州兵

一千名迭准督臣徐廣縉咨函現當該省防剿勢

難分撥而廣西賊勢方熾即使金田撲滅各路尙待掃除兵力實不敷用查雲貴相距較近兵額較多可否籲懇

天恩敕下雲貴督臣撫臣再於兩省各調精兵一千名遴委得力鎮將管帶兼程來粵協剿如能及早肅事卽由臣等飛咨截回以節糜費謹會同兩廣督臣徐廣縉合詞恭摺由驛具

奏伏乞

皇上聖鑒訓示謹

奏 咸豐元年二月十一日具

奏奉

硃批另有旨欽此

謹將廣西各屬探稟賊匪股數及賊目堂名開單
恭呈

御覽

一廣義堂賊首潘姓陸姓夥匪徐大阮大約共二
三千人由上龍土司分竄又龍州之羅回崗另
有賊目黃晚股匪數百人

一義勝堂賊匪數千人由龍安縣屬分竄至鎮安
之向武鎮遠吞等各處該匪共分三股又名得

勝堂洪勝堂號稱七八千人

一東蘭州逸匪與永義堂廣匪約共千人由土田
州竄至泗城之淩雲縣屬經兵壯剿捕復竄鳳
山土司境內

一謝長腰四一股夥匪千餘人由上林竄至定羅
土司境內現派兵壯剿捕

一欽州之大寺墟長灘小董墟良利墟靈山之奔
塘崎靈墟等處大股賊匪人數約有萬餘屢據

南甯府探報將竄上思州宣化縣等處已飭上
緊嚴防

一新甯州之龍頭墟亦有另股賊匪竄至州屬之
渡頭墟及蕭村等處

一賊首劉八等糾黨千餘人由石城縣屬青平墟
被擊竄至博白縣之大垌墟該縣獲犯訊供此
股人數約有萬餘現經飭帶兵練會同東省官

兵堵剿

一懷集縣之橋頭墟有賊千餘人由開建縣屬分
竄將至賀縣舖門地方現派兵練防守

以上各股賊匪均據各屬查探稟報時有聚散
出沒股數人數約畧相同均經嚴飭地方文武
會督兵練分別相機督辦其金田大股逆匪現
經會籌攻剿續獲勝仗另行會摺

奏報合併陳明

會奏永安蒼梧遷江象州平南宣化來賓東蘭河池博白等處拏獲匪犯片子

再查粵西各屬當大兵剿捕之際賊匪逃散必多經_臣等疊飭上緊嚴緝茲據鹽法道林士傳轉據永安州稟報盤獲陸廣南等六名竝搜出腰牌紅布大刀等件提訊供認糾搶屬實又據梧州府知府湯俊稟報督飭印委各員在蒼梧縣屬之夾石嶺兩次剿捕殲斃賊匪多名生擒陳四等共五十

三名訊明供認聽從鍾敏和擒劫拒敵官兵不諱
均解赴勞藩司行營覆審正法又據代理遷江縣
知縣嚴正圻先後稟報拏獲首夥蒙大方覃特開
等十四名竝搜出拜會白布提訊供認迭劫拒敵
官兵不諱另獲私販硝磺之吳朝賢等四名及蒙
大方之妻糾眾復讎之黎特卯等三名均據供認
屬實又據署提標中營守備蘇春華稟報防守花
路等處拏獲匪犯陳老九等三名解赴象州訊供

實係金田逆犯遣來探聽消息之匪又據代理平
南縣知縣周誠之稟報拏獲匪犯楊九李二等二
名訊供亦係金田逆犯遣來探聽消息之匪又據
署宣化縣知縣李天鈺先後稟報拏獲匪犯蘇寶
同莫士欽蘇廣集等二十九名又據來賓縣知縣
趙啟昀稟報拏獲積盜麥亞保竝夥犯韋老漢等
二名又據署象州知州彭作檀會同委員豐安拏
獲匪犯許亞苟蔡老水二名又據東蘭州知州曹

變培稟報會營督同鳳山土司等帶領兵壯團練
在凌雲縣屬之謀隘古紉地方勦捕殲斃賊匪五
十餘名生擒賊目黃四王等四名夥賊李唐客等
四名又據河池州知州鄧樹榮稟報在三旺之喇
相山兩次勦捕殲斃賊首韋世堯及匪夥九十餘
人生擒首夥韋世貴李老晚等旋因傷重身死復
於各巖內搜獲陳二等九名又據博白縣知縣游
長齡稟報拏獲匪犯劉亞十等十三名各等情

臣

等復加查核均飭分別解審處決並將出力之兵壯紳練等量加獎賞仍飭各府州縣嚴緝在逃餘匪以靖地方謹會同兩廣總督臣徐廣縉合詞附片陳明伏乞

聖鑒訓示謹

奏

硃批另有旨欽此

會奏粵西蠲緩毋庸查辦

請將本年新賦緩俟軍務告蒞後徵征摺子

奏爲欽奉

恩旨豁免節年民欠錢糧廣西被賊之區前經奉

旨飭查分別蠲緩銀兩卽在各省普免之內無庸查辦

其本年新賦應請緩徵以紓民力恭摺奏祈

聖鑒事竊查廣西各屬上年被匪滋擾所有道光三十

年應徵錢糧因民力拮据經前撫臣鄭祖琛

奏請分別緩徵欽奉

上諭前因廣西被賊蹂躪征調頻仍特降諭旨令林則徐查明被擾及官兵經過地方將本年應徵錢糧分別蠲免緩徵現據鄭祖琛奏請酌量分數應徵應緩自係在未奉諭旨以前著李星沅周天爵勞崇光等遵照前旨迅速查明鄭祖琛所奏情形是否分別緩徵即可稍紓民困如兵燹之後州縣中有全境被擾力難輸將者卽量予豁免朕亦不惜立沛恩膏俾吾民共登衽席等因欽此臣等跪誦之下曷勝欽感卽

經督同署藩司吳鼎昌遴委明幹賢員分馳前赴
被賊滋擾及官兵經過各地方逐一詳查體察民
情分別蠲緩正在督飭核辦間接准戶部咨開咸
豐元年正月初一日欽奉

上諭朕寅承丕緒撫馭萬方當茲建元肇始之時宜行
體元長人之政所有各省節年民欠正耗錢糧等項
卽著各該督撫將軍府尹等將道光三十年以前實
欠在民者詳細查明具奏候朕以次降旨全行豁免

等因欽此仰見我

皇上鴻慈渥逮

聖澤宏敷薄海臣民同聲感頌查上年廣西各屬被賊蹂躪征調頻仍之區閭閻實深困苦卽地方未經被擾而收成歉薄杼柚幾空民艱均爲可惻茲旣仰荷

新綸道光三十年以前各省民欠錢糧蒙

恩普免似廣西各屬前經奉

旨飭查分別蠲緩此時三十年以前民欠自己共沐
皇仁毋庸再行查辦惟現在軍務未蕪通省民氣未紓
而本省應徵地丁兵折等銀卽在啟徵之際民力
恐有未逮應請緩俟軍務完竣後啟徵以示體恤
所有三十年以前節年民欠實在數目若干仍飭
藩司勞崇光會同署藩司吳鼎昌等督屬覈實鈎
稽分別開單詳請具

奏恭候

恩施所有廣西被賊滋擾各屬上年應徵錢糧業奉詔
免現可毋庸查辦其本年新賦應請緩徵緣由謹
會同兩廣督臣徐廣縉合詞恭摺附驛具

奏伏乞

皇上聖鑒訓示謹

奏 咸豐元年二月十一日具
奏奉

硃批另有旨欽此內閣奉

上諭李星沅周天爵奏廣西省本年新賦懇請緩徵一
摺本年元旦經朕降旨飭令各省將節年民欠錢糧
查明奏請豁免所有廣西節年民欠應行查豁者自
已覈實辦理惟念該省軍務未戡地方多被蹂躪何
忍更事追呼著再加恩將廣西本年應徵地丁兵折
等銀一併緩俟軍務完竣再行啟徵以示體恤該部
知道欽此

會奏查參上年失事廳州營員一併革職摺子

奏爲遵

旨查明粵西失事廳州營員請

旨一併革職以示懲儆恭摺由驛覆

奏仰祈

聖鑒事竊查明江甯明燧蘄龍州永康河池左州各廳
州營上年先後被賊擁入滋擾經前撫臣鄭祖琛

節次具

奏聲明批飭詳查稟覆核辦並奉

諭旨確查具奏等因欽此除龍州同知王淑元罵賊被
害已蒙

恩准議卹署龍憑營都司譚承德亦經會摺

奏參署永康州知州高汝霖該州吏目兼署左州吏
目時榮現已奉

旨革職代理左州知州保徵據報因病出缺外所有失
事各文武節經臣等分飭該管道府確查詳辦茲

據署左江道彭煥轉據署太平府知府吳德徵稟
稱賊匪於道光三十年七月初八日竄至明江署
守備李陞榮外委蔡榮尊黃現達率兵抵禦衆寡
不敵致被賊匪擁入分赴營署民房搶掠署同知
恆椿千總何光燦時在板利村堵禦該匪等復翻
山渡河於初九日竄入甯明州城兼署知州恆椿
添傳團練於初十日趕回圍捕匪卽退出竄至
蘆地方署都司羅起龍帶兵抵禦亦因衆寡不敵

致將衙署民房劫掠逃竄明江同知關防甯明州
印信及倉庫監犯俱無損失守備李陞榮受傷跌
落深溝遇救回營又據稟稱委員查勘永康州城
早已坍塌道光三十年八月二十六日賊匪繞過
州城署知州高汝霖先帶壯丁在隴東防堵城守
外委劉鳳懷管帶兵練同州署幕友王友樞至高
嶺堵禦賊匪殺斃王友樞及兵勇書差圍練多人
乘勢直撲州署拒傷吏目時榮竝開監放走監犯

五名及囚禁大堂解審遣犯四名高汝霖妻女同族叔祖母在署被賊殺傷先後因傷殞命竝非前任眷屬文卷間有燒燬倉廩穀石亦俱拋棄倉外又據稟稱道光三十年九月十九日賊匪數百人擁入左州城內代理左州知州保徵親赴四鄉傳集團練進城剿捕竝知會把總劉克成外委李崢發接應轟斃賊匪數十人匪等卽由西北隅城缺逃出倉庫監獄俱無損失州署間被打毀又據代

理龍州同知李懋莘稟稱道光三十年八月初七日賊匪二千餘人擁入龍州廳署兵練力不能敵照磨朱濂在監防守被匪用棍戳傷胸膛倒地竝砍傷照磨家丁王成殺斃禁卒崔德放出監犯阮左一名同知王淑元身親抵禦被匪砍傷肩腰拖擡行走王淑元第三子監生王光頡率家丁秦炳等上前救護被匪登時殺斃竝傷斃家丁二人書差更夫鄉勇九人該匪復將王淑元屍首拋棄河

內旋經撈獲棺殮又搜去同知關防劫去庫貯兵
餉銀七百兩並雜款銀兩另行開報各員弁家屬
均已尋回千總張登魁把總袁國璘應歸革員譚
永德案內審辦又據慶遠府知府鄭瑞麒稟報據
署河池州知州鄧樹榮稟稱道光三十年九月二
十一日賊匪入州滋擾文武被圍該署州先在黃
家營防堵復被賊匪截住去路退至德勝請兵救
援吏目張文棟已被賊匪用刀砍傷左右偏額倒

地竝將弓役韋任砍傷家人李玉黃明傷斃劫去
監犯九名該署州胞弟鄧顯烈守護印信奔往南
丹土州倉廩衙署均未損壞代理守備田遇芬業
已因傷身死各等情臣等覆核無異查署甯明州
兼署明江同知恆椿署河池州知州鄧樹榮河池
州吏目張文棟龍州廳照磨兼署甯明州吏目朱
濂署趙靈營都司羅起龍署明江廳守備李陞榮
外委蔡榮尊黃現達甯明千總何光燦永康州外

委劉鳳懷左州把總劉克成外委李崢發當賊匪
竄擾之時土城本多坍塌該文武倉猝抵禦匪徒
旋即逃散與失陷城池有間竝查無臨時逃避情
事惟既已疎防於前復不能追捕弋獲實屬咎有
應得未便稍涉輕縱應請

旨一併革職以示懲儆此外巡城各武弁容再飭營覆
查另行參革謹會同兩廣總督臣徐廣縉合詞恭
摺具

奏伏乞

皇上聖鑒訓示謹

奏 咸豐元年二月十一日具

奏奉

硃批另有旨欽此內閣奉

上諭李星沅周天爵奏遵查失事廳州營員請一併革職一摺前因廣西明江等城被賊匪竄入降旨飭將失事各員弁確查具奏茲據該大臣等查明該員弁

等於賊匪入城之際倉猝抵禦匪徒旋即逃散與失
陷城池有間竝查明尙無臨時逃避情事惟旣疎防
於前又不能追捕弋獲於後實屬溺職咎有應得署
甯明州兼署明江同知恆椿署河池州知州鄧樹榮
河池州吏目張文棟龍州廳照磨兼署甯明吏目朱
濂署雋縣營都司羅起龍署明江廳守備李陞榮外
委蔡榮尊黃現達甯明千總何光燦永康州外委劉
鳳懷左州把總劉克成外委李崢發著一併革職以

示懲儆其前經降旨革職拏問之都司譚承德並副
將李殿元等仍著嚴審定擬具奏餘著照所擬辦理
該部知道欽此

附奏密覆

寄諭竝遵

旨飭令鄭祖琛回籍片子

再臣准署撫臣周天爵承准軍機大臣字寄奉

上諭李星沅既命爲欽差大臣自宜總領戎行專司籌辦而周天爵向榮各受知遇重恩務各殫竭智力相助爲理現在周天爵甫抵桂林向榮在潯李星沅在柳總須扼要分防仍復和衷合辦使三人如一人協

力同心剛柔互濟泯意見而杜推諉於事方爲有濟
等因欽此跪讀之下感激涕零伏念臣以至愚極
陋之身當遺大投艱之任仰蒙

恩遇願切捐糜自上年十二月十五日馳抵柳州行營
倏已兩月曾無寸長自效茲復

溫綸渥逮

訓誡周詳臣具有天良應如何知感知奮早紓

塵望周天爵之戇直向榮之勇敢久在

宸鑒之中其年齒皆長於臣職分相若皆臣夙所推服
此次同辦軍務以誠相與彼此絕少推諉意見亦
無差池至行軍機宜間不容髮全在知已知彼擇
要相時臣雖計慮迂庸亦何敢藉口持重坐視延
誤惟當虛心實力緩急熟籌扼要分防和衷合辦
如果剛柔互濟實有萬難之處容卽據實上

聞祇請

訓示斷不敢自甘緘默上負

鴻慈所有奉

諭訓勉緣由謹附片密陳伏乞

聖鑒至已革巡撫鄭祖琛力疾隨營現經遵

旨飭令回籍合併陳明謹

奏

硃批覽欽此

會奏官兵焚攻金田逆匪巢穴賊黨敗竄摺子

奏爲金田逆匪現經大兵連日合力攻勦業將賊巢
焚燬殲擒黨夥甚多賊勢已蹙翻山逃竄臣等仍
督飭堵截追擊迅掃逆氛恭摺由驛奏祈

聖鑒事竊查桂平縣金田逆匪竄踞大黃江牛排嶺等
處前於二月初三初五等日兵勇迭次攻勦均獲
勝仗殲擒一千數百名奪獲砲械無算業經會摺
奏

聞在案查該匪自被官兵擊敗深踞賊巢負固不出臣
向榮卽飭候補知府劉繼祖督帶水勇由前岸迎
擊并飭將弁帶領兵壯分赴牛排嶺計誘離巢以
圖夾攻初六日各將備帶領兵壯馳至牛排嶺開
礮誘敵候補知府劉繼祖聞大營槍礮施放不絕
亦卽率同水勇馳至大黃江前岸開礮接應又候
補知府陳瑞芝督率各委員所帶壯勇五百餘名
由大黃江對岸開放大礮同知英秀帶八步勇船

五隻由官塘駛至水陸夾攻該匪亦放槍礮回拒
自午至酉奮力衝擊殺斃賊匪數百名燒燬賊屋
三處匪船一隻奪獲軍械多件其官塘團練亦轟
斃該匪多名壯丁受傷十餘名傷斃數名該匪潰
敗回巢初七八日官兵仍分水陸三面夾攻該匪
用礮據守寨門抵死不出并因官兵連日焚攻力
不能禦探聞似有逃竄之意臣向榮復於初八日
夜間密派該府劉繼祖督率壯勇潛赴北岸乘其

不備施放火箭適中河邊茅屋頃刻火發兵壯槍礮齊施傷斃該匪多名壯勇趁勢擁上江岸追殺奪獲器械多件賊匪大夥均先退至牛排嶺臣向榮見火光燭天知江墟賊巢已焚卽同雲南臨元鎮李能臣署貴州鎮遠鎮周鳳岐親督官兵馳往圍剿賊見大兵將至料難抵敵卽偕黨夥連夜向新墟等處潛逃又經催督官兵飛速追剿殲斃賊匪數十名生擒十餘名奪獲擡槍擡礮及五子礮

等二十餘桿並賊械多件當將牛排嶺巢穴一并縱火焚燬隨提生擒各犯查驗均已蓄髮二寸餘身上佩有紅帶黃布條記當加嚴訊該犯等箝口不語絕無供詞卽經斬首梟示旋據探報該匪已由新墟漏夜竄入紫荆山逃往武宣東鄉該處山徑叢岐武宣象州桂平平南永安修仁各州縣均多接壤臣向榮先經札飭一律堵截卽日親率副將和春參將成安等分領楚粵官兵馳往武宣各

要隘相機督剿竝飭水勇船礮駛往勒馬河扼彼
去路臣李星沅札飭貴州鎮遠鎮秦定三管帶黔
省官兵速探賊踪迎頭截擊雲南臨元鎮李能臣
管帶滇省官兵由新墟一帶從後跟追臣周天爵
由柳赴潯十三日舟過武宣知賊踪竄近東鄉卽
駐該縣督辦飛調大營官兵并飭候補知府張敬
修所帶壯勇一千二百名由平南前來備用其已
到閩勇獠勇共一千名暫駐東鄉較近之三里墟

聽候派剿臣李星沅又經催調貴州署古州鎮李
瑞管帶後起官兵八百名速赴武宣象州擇要防
堵一面疊飭交界各州縣調集團練於山徑各隘
口分布截拏無使米糧接濟游匪糾合其紫荆山
碧灘羅淥洞等處卽飭署桂平縣知縣李孟羣親
帶團總練丁嚴密堵禦並選精熟誠實鄉導隨同
官兵進剿查此股逆匪人數雖尙衆多而賊巢已
失無可負隅前被裹脅從行及老幼婦女屢經臣

等剴切示諭設法解散近多乘間逃歸該匪情勢
日窮現圖鋌險亡命不過苟延殘喘然正未可輕
視臣等惟當激勵將士一鼓殲除前截後追分堵
合剿以冀兇渠授首反側歸心早慰

九重宸注所有金田賊巢現經官兵焚攻竝殲擒多匪
賊已敗竄臣等仍督飭上緊截剿緣由謹會同兩
廣督臣徐廣縉合詞恭摺馳

奏伏乞

皇上聖鑒訓示謹

奏 咸豐元年二月十七日具

奏奉

硃批另有旨欽此

附奏查參游擊馬芳春都司麻長慶摘頂仍革留片子
奏再查橫州謝長腰四股匪竄入上林武緣等處前
經飭署游擊馬芳春都司麻長慶等管帶兵丁壯
勇馳往勦捕二月初二日追至定羅土司地方該
匪分兩路迎拒馬芳春等督令弁兵施放槍礮殲
斃賊匪二十餘名該匪卽由山嶺逃竄兵勇乘勢
追殺奪獲長針簾牌等件并生擒劉其發一名搜
出小旗一枝上書天字先鋒奉大館令字樣卽將

該匪正法復督兵壯追至土坡有藍旗賊數百人
伏於山凹見官兵奮勇前進卽用馬隊衝突致官
兵首尾不能相顧撫標武舉黃彥彩被賊傷斃又
值大雨如注礮火俱受潮濕不能施放該游擊等
卽將兵壯撤至久壩嶺暫紮查點弁兵尙有撫標
世識李錫鉞署外委磨一鋒不知下落兵壯畧有
傷亡器械亦有損失該匪卽分竄下旺白山等土
屬初五日復經文武各員督飭該處練勇人等合

力圍捕殲斃賊匪二十五名生擒三十三名受傷
逃竄者不計確數竝奪獲長針刀械數十件團丁
亦傷二人查此股賊匪經游擊馬芳春等督帶兵
壯勦捕開仗甫有斬獲旋因山凹遇伏以致弁兵
傷亡雖獲勝在前而疏失在後實難辭咎相應請
旨將署右江鎮標中軍游擊馬芳春護賓州營參將事
都司麻長慶先行摘去頂帶仍革職畱任嚴飭督
率弁兵確探賊蹤奮勇追剿再行分別辦理撫標

効力武舉黃彥彩剿賊捐軀懇

恩飭部議卹其世職李錫鉞署外委磨一鋒現飭查明
實在下落另稟核辦謹會同兩廣督臣徐廣縉附
片具

奏伏乞

聖鑒訓示謹

奏

硃批另有旨欽此內閣奉

上諭李星沅周天爵向榮奏大兵攻剿金田逆匪破燬賊巢殲擒夥黨現飭堵截竄逸一摺該匪被官兵疊次擊敗後負隅固拒二月初六日提督向榮督飭弁兵馳至牛排嶺開礮誘令離巢候補知府劉繼祖等各帶水陸壯勇至大黃江一帶分路夾攻殺斃賊匪數百名燒燬賊屋三處匪船一隻其官塘團練亦轟斃該匪多名次日官兵仍分水陸三面夾攻該匪據守不出欲圖逃竄初八日夜間向榮密派劉繼祖等

潛赴北岸施放火箭焚燬賊屋兵勇趁勢擁上江岸鎗礮齊施傷斃該匪多名向榮見江墟賊巢已焚督同總兵李能臣署總兵周鳳岐親統大兵馳往圍剿該匪不能抵敵卽偕夥黨連夜逃竄新墟及紫荆山等處官兵追剿斃匪數十名生擒正法十餘名奪獲礮械無數當將牛排嶺賊巢一併縱火焚燬此次官兵於數日之間合謀併力連奪賊巢殲擒甚衆匪勢窮蹙奔逃在事文武均屬奮勉出力所有首先施放

火箭之候補知府劉繼祖著加恩賞戴花翎總兵李
能臣署總兵周鳳岐候補知府陳瑞芝同知英秀均
著加恩交部議叙該匪現竄武宣東鄉山徑叢雜賊
首尙未擒獲向榮已親督官兵分路堵截李星沅飭
令秦定三李能臣等管帶滇黔官兵迎擊跟追周天
爵亦駐武宣督飭進剿務須乘此賊鋒大挫之時激
勵將士一鼓殲除於各要隘處所前截後追分堵合
剿以期掃穴擒渠不畱餘孽勿任竄逸蔓延爲要另

片奏橫州剿匪情形謝長腰四一股匪徒前經向榮
擊敗後復敢分竄肆擾經游擊馬芳春等帶兵馳剿
至定羅土司地方殲斃賊匪數十名生擒劉其發一
名奪獲器械多件該匪由山嶺逃竄官兵進追忽遇
伏賊兵壯畧有傷亡次日復合力圍捕殲匪二十五
名生擒三十三名此股賊匪經官兵先後斬獲乃因
山凹遇伏致傷弁兵實屬疏失署右江鎮標中軍游
擊馬芳春護賓州營參將事都司麻長慶均著先行

摘去頂帶仍革職畱任以觀後撫標効力武舉黃彥
彩剿賊捐軀著該部照例議卹世職李錫鉞外委磨
一鋒查明實在下落核辦餘著照所擬辦理該部知
道欽此

恭謝

頒賞

宣宗成皇帝詩文餘集摺子

奏爲恭謝

天恩事臣於咸豐元年二月十五日在廣西柳州府行營由兵部遞到蒙

恩頒賞

宣宗成皇帝詩文餘集臣跪領之下感激涕零欽惟

宣宗成皇帝聖德宏垂超虞夏商周而闡繹

文思光被綜典謨雅頌以敷言我

皇上學懋緝熙

孝隆繼述合

鈞韶於五百九首玉振金聲尊

彝訓於六十七篇上蟠下際臣藥韉勉效螽斯多慚

寶笈新頒

鴻施至渥

奎章遠煥益開邊徼之雲山兵氣全銷共仰

重華之

日月所有

微臣

感激下忱謹繕摺叩謝

天恩伏乞

皇上聖鑒謹

奏
咸豐元年二月十七日具

奏奉

硃批知道了欽此

會奏請

簡將軍督剿竝添調皖豫官兵摺子

奏爲廣西賊勢披猖官兵不敷策遣據實叩懇

天恩

特簡總統將軍兼程來粵督辦竝添調精兵數千名以資分撥堵剿恭摺由驛奏祈

聖鑒事竊臣向榮蒙

恩調任粵西提督上年十月抵任迅卽管帶楚兵剿捕

賊匪_臣李星沅_臣周天爵亦於上年十二月本年正月先後銜

命馳抵行營會同籌辦近因金田大股逆匪自官兵擊敗後現竄武宣東鄉復敢恃強抗拒_臣等已往復商定仍合滇黔楚三省官兵及各路兵勇併力相機攻剿此外賊匪股數前經約畧開單恭呈

御覽竝飛飭地方文武各就防兵團練隨時以堵爲勦專候武宣事竣迅卽分兵勦辦乃連日各處警報

紛至沓來據南甯府稟欽州靈山宣化三處連界
地方匪徒聚集萬餘將至府城附近之亭子墟開
角滋擾該府迅帶兵練親往各要隘查探堵禦等
語又據新甯州稟稱該州龍頭墟塘岍水邊等處
近有賊匪六千餘人竄入滋擾等語又據賀縣稟
報賊匪千餘人由廣甯懷集一帶竄入該縣近城
三步梯卽在河東盤踞等語又據鬱林州稟石城
賊匪劉八信宜賊匪凌十八兩股糾夥共一萬三

四千人竄擾博白縣境該州督縣傳集團練截擊
劉八一股微有斬獲等語臣等接閱之餘萬分焦
急卽經酌派兵勇竝飭交界各州縣添集團壯合
力應援而武宣正在吃緊大兵斷難派撥臣李星
沅隨護行營竝無一兵一將卽兼籌各路亦只因
地因人設法支持不能以無爲有本省兵旣不足
客兵數復無多不合則力難專攻不分則勢難兼
顧據目前賊勢蟻集蜂屯少亦數千多輒累萬西

匪固倏遠倏近東匪亦時往時來若非添調勁兵
重臣爲之統領一力分堵合剿全局殆不可問臣
等受

恩深重此身何惜捐糜但期於事有裨必須及早籌定
伏乞

聖謨乾斷於曾經行陣諸臣中

特簡總統將軍兼程來粵督剿並調安徽河南精兵數
千名速派得力鎮將管帶前來合之續請雲貴官

兵練壯分途派撥痛加剗洗以期迅速藏事再臣
等前請軍餉三十萬兩現由督臣徐廣縉籌解二
十五萬兩尙有五萬兩未奉部行何處撥解又續
請軍餉八十萬兩內有本省例放兵餉銀二十餘
萬兩竝各糧臺需用急迫祇候

敕部速撥接濟以免貽誤臣等無任悚懼待

命之至謹會同兩廣總督臣徐廣縉合詞恭摺具

奏伏乞

皇上聖鑒訓示謹

奏 咸豐元年二月二十一日具

奏奉

硃批另有旨欽此